

景
文
集
二









景
文
集
二

宋 祁 撰



中
華
書
局



景文集卷七

五言古詩

迎春曲三闋

青陸斗杓回。河內動新灰。冰際綃紋綻。雲邊鶴影來。漢宮行慶罷。花樹剪刀催。東郊風馭軟。嚴署漏籌添。柳拂將軍壁。梅飄公主奩。舞衣裁幾許。新人解織纈。荔達陽膏動。冰解水紋融。天花四面碧。日氣幾竿紅。不言雙燕晚。爲嘆玉箱空。

散關

磴道何盤盤。百步人一憩。引節高山顛。關存不置吏。昔緣暴客須。今爲有道廢。

和成上人

西山有尊者。秀出于稻麻。徧參居第一。諸佛素所嗟。錫聲來赤縣。被袂垂青霞。流出一切妙。普見大千沙。我法果無在。味者茲有涯。是凡方是聖。歸正即歸邪。妄懷萬緣息。舉意千里差。有客謝病免。清辭春月賒。靜眠金粟室。厭坐馬融紗。伯氏比多齋齋動或累日觀化晒褻勒。自呼嚙鏤鐸。瞻言世外友。相期心不遐。揮斤郢匠室。流水子期家。披雲示駛月。拂果去空花。師嘆未曾有。君對無以加。清襟互默遣。所得非齒牙。層陰朋盍阻。

坐久丹霏斜。涵毫泚仙滴。抒藻揚晨葩。

水文壘石

曉波清蒼痕。厯激翠將腐。奔濤已東決。磊塊畱不去。巧匠取之出。入資園亭趣。陰罅嚼餘苔。寒凹逗輕露。彼怪予弗談。不轉吾所慕。

遠行

楚人巧悲秋。分作四種戚。最極有遠行。百感攢羈臆。林鳥戢和啼。屯雲獻慘色。客久歸念長。年驚壯圖窄。撫物盈近嘆。驅駢擁遙側。曉斗亦告勞。垂杓臥樓北。

早秋有感

一葉飛足驚。要是變衰始。毛澤自茲竭。多露方夜委。涼蛸抱空號。腐燐變幽燬。怛然感物化。鬚髮不常美。義和鞭白日。已復向濛汜。功名未及見。軒冕胡足恃。坐客憫予憂。粲然啟玉齒。輟嗟謝諸郎。長年行自爾。

讌集

素節倏已宴。高風送浮涼。拂席進賓客。醺酒羅壺觴。黃鷄跼跼美。紫蟹螯螯香。莫矜來歡早。須念後戚長。奔川無緩瀾。徂日不還光。願客且安坐。調絃未遽央。

水月

渺渺遡雲波。盈盈梀霜馭。碎壁擁舟來。流金映沙聚。夜寂波已休。何人薦真趣。

和君貺學士宿淮上見寄

使舲旣邈邇。淮溜劇沿泝。我行非不遠。君節自前路。烟汰歷濠汭。霧氛逗荆樹。感此言邁情。慰予索居慕。日歸歸未辰。慘別別已屢。努力保素衿。天途遲還翥。

鈴轄冒上閣就移知雄州

聚散非一端。賢逸難兩途。擁節北臨邊。安得久交臂。此行詎不遠。印瑞三且二。

以拜官領職自東閣降凡兼五名

背劍車

乘輅徑秦驂。舞轡雄州乃劇藩。喉領塞南地。譯通老上庭。道係單于使。適館授主漿。乘韋交客贊。列戍儼趨風。諸將走咨事。應變君所長。立功今可冀。君家誠易知。世烈在青史。齊楚異姓王。陰鄧后家里。券字金對行。戟帶霞交尾。濬源無近波。高峯本洪址。行矣勵壯猷。公侯當復始。

常山楊氏有二怪石奇險百狀田曹張中行家雒陽徧見都中諸家所得異石皆出此下予他日思之恐常人忽而不珍作詩以詫其處并邀中行伯逢同賦

塊然兩奇石。譎怪狀難悉。千仞裂嵯峨。一氣與嶢峩。四隅薺剝膚。萬古雲漬骨。補餘天所委。隕罷星不沒。橫蒼對偃蹇。怒翠競騰突。神媼祕弗露。狂鼉扑而失。由茲落人宇。得用玩奇質。屹如不可轉。挺若無所屈。鬬虎攫餘痕。乖龍臥殘窟。撐掉壯士槩。奮立直臣笏。危頂烟天矯。窄竇雷鬱律。濤頭縮不長。魑臂憤相猝。

變現載靈牒。呵護費神物。窮陬苦陋庠。珍珎恐湮汨。各保堅礧姿。以待封山日。

反騷

我聞上天樂。仙聖並游資。離楚何所據。招回逐客魂。騷辭魂無上天謂門有九關。虎豹代守閤。砥舌饑涎流。觸之輒害人。譏呵自有常。帝意寧不仁。窮壤苦恨隔。傳聞恐失真。我欲稽首問。無梯倚青雲。塊然守下士。此憤倚山伸。

懷三封墅

寡求願易足。久計還中林。君恩容有報。宿願音未抽簪。淺謀乏經濟。流景倏頽侵。企翰羨鴻翥。俯泳愧魚沈。榮名非不勉。高坻良可歆。奈何賈生慟。又將莊舄吟。投沙乃聞古。懷春方在今。三封何所懷。懷我東南畝。方春原田秀。是時簦笠聚。杏花燦晴落。莖葉甲陰浦。泱泱雲抱岑。眇眇林鳴扈。野老攜晨饌。薄醪間炊黍。安知五熟滋。但慰四友苦。日作夕還家。烟火青林下。嗟我仕易稼。窮年宦三輔。誓畢尙生累。將從平子賦。自省非大人。請事學農圃。

風雨

昨夜東風急。疎牕薦雨入。溪南梅正花。狼藉隨塵沙。皓皓多易汗。不得同春葩。春葩能有幾。紛紛入桃李。時哉小興衰。人生猶物理。明發簷沈聲。鳥雀喧新晴。老農脫襪襪。一犁原上耕。

秋興

西顙肅涼氛。天宮正岑寂。淒風條未吟。浩露林下滴。寥寥燕辭楹。促促蛩在壁。池潦湛寒綠。鱗雲屯晚白。齊紈不復御。桃笙已復易。嗟哉無壯士。翻車忽西匿。有客過我廬。問我何悽惻。氣索不能對。披襟長太息。

金雀花

疊葉倚風綻。翩翻凌霧排。齊名仙母使。寫樣漢宮釵。俗眼未應妬。忽憂珠彈來。

浮屠

乞食古爲恥。浮屠名自修。黎明抱應器。禺中飮乾饌。果腹固其願。之播非所羞。歉歉常不足。遑遑茲有求。素飽聊安坐。調饑復來游。顧爾殊靈輒。翳桑何用酬。

四季花

羣葩各分榮。此獨貫時序。聊披淺深艷。不易冬春慮。眞宰竟何言。予將造形悟。

雜興

寒暑亟徂謝。日月如崩波。稚容不再妍。戚戚奈老何。聞有遯世客。安處西山阿。手操九籥契。晝夜養丹砂。藥成可化金。舉身凌紫霞。我願從之游。脫身此世羅。辦裝秣吾馬。臨路更自訶。古來松喬流。矜已好浮夸。萬一爲藥誤。得無我計差。速還具肴酒。毋爲後人嗟。

河東有賢守。帝念不能已。欲置之大夫。徵輶疾于水。留邸月餘罷。君恩詎可恃。召以一人舉。去由一人毀。鉅平名世賢。媚者強相軋。毀語填君聰。亡吳計中奪。人生不如意。在十常九八。茲事可奈何。惆悵千載末。殘暑辭遙夕。初涼澹蕭辰。燕索西飛伴。雁作南來賓。霽鬱靜蟲蟲。遠水清鱗鱗。由來搖落恨。先付長年人。

錦亭晚囑

長夏宜高明。緩帶散煩窘。憑軒一起然。目與天共盡。山從雲端現。日就林外隱。風來草樹披。烟生井閭近。自公況多暇。冲臆無留蘊。卽此可宴居。何須事遊軫。

初伏休沐

伏時詔休假。閉門謝朋儕。羲和挾升陽。晚氣紅崔嵬。炎林鬱歊露。焦原橫赭埃。怒甚翠翠雲。旱始隆隆雷。況我庇茨宇。煩襟安得開。因拘訴巾幘。仇怨被酒杯。湯沐未及具。反爲蟣虱咍。北風硃杏嘿。義人安在哉。遊囑

顯風肅九晏。樓榭注明迴。林爽無剩繁。溪澄有餘映。四阿延清霏。六幕盡高興。號枝蟬腹厲。掠野鶻拳勁。山意日久高。差差插空淨。

送蔡元翰賢良昆仲

美箭出東南。之子哀然秀。綽綽令兄弟。茂器偕年就。九流無近討。六藝乃遐究。詔書求異等。二惠茲來覩。

鴈均方朔多。幅比吾丘濠。蹠足蜩封塲。刷羽桐花園。孤音或少和。至寶不期售。肇允褰褐衣。薄言返巖竇。江臯看魚樂。山徑懷雉鳴。無忽豫章材。行參栢梁構。

送伊闕鄭著作

君年已艾服。沿牒困風塵。硯新始發刃。鳴晚逾驚人。毋辭滯下邑。姑欲慰斯民。此路塵車往。明年郊雉馴。恨乏雙鳬鳥。從子伊水濱。

攬鏡

晚匣寫菱影。試觀憔悴顏。支離骨不媚。蕭颯鬢垂斑。安得長康畫。致之巖壑間。

望月西廡作

夏琯倏已新。夕杓見南指。孤月霧中來。餘光淡前戺。賞襟初不淺。極睇天漢涘。浮雲竟未還。多露已徐委。太虛本自寂。遊氛強爲滓。安得千里風。披霄玩澄晷。

歲豐

皇天降豐年。本憂貧士食。貧士無良疇。安能得稼穡。工傭輸富家。日落長歎息。爲供豪者糧。役盡匹夫力。天地莫施恩。施恩強有得。

題信相院默庵

對言方有默。因默乃名庵。庵畱默不遣。一物遂爲三。龜掃泥中痕。正恐力弗堪。自問呵默者。了然成妄談。感懷

夕風搜前林。墜葉快如剪。老月扣戶低。傾河去人遠。吉士感物化。勞勞意不展。輟飲屏樽杓。畱釭討墳典。觸事孟軻迂。臨途安國蹇。不歎歲月遒。所悼功名晚。

念衰

歲月不待人。驅我向衰境。朱顏日辭貌。縞髮颯垂領。意昏若坐霧。歡墜似羸井。病多茲及慵。志怯遂依靜。問我何功德。乃玷鷄翹省。始願常謬悠。薄霄圖振景。棧車值塞路。蹇蹇莫吾騁。君恩蓋如天。分虎向東郢。沈憂誠萬緒。通宵付耿耿。失旦安暇鳴。值露徒能警。私計狹且偷。榮路浩方永。惟餘昧死章。將露乞身請。

七言古詩

擬東武曲二首

甘泉烽火照黃昏。候騎駸駸入鴈門。光祿塞前逢夜月。黃龍城下見愁雲。隱隱輕雷逐車響。顏行使者樂相望。勞軍細柳尊亞夫。持節雲中赦魏尚。自從天子樂休牛。故障遺亭豈重修。李廣不生高祖世。豈得今封萬戶侯。

我家世世山西士。二十期門從天子。始隨驃騎破祁連。晚逐樓船下犍水。漢北雰雰飛雪暗。海中跼跼翔

爲墜歸來武庫祭蚩尤。得從甘泉參豹尾。何意一朝兵後期。笏責侵誣屬軍吏。黃金納贖爲庶人。白首還家事田里。結髮從軍七十戰。利鏃金瘡猶可記。龍鍾雖入玉關門。止呵還遇灞陵尉。不及金張藉舊勳。七葉華貂長富貴。

少年行

君不見漢家五陵諸少年。白馬驪駒大道邊。紫綸裁帽映兩紐。黃金錯帶佩雙鞬。經過主第賜綠幘。歸宴前堂羅曲筵。長安多逐韓嫣彈。別藏仍收張氏錢。傳言天子將羽獵。千乘萬騎向甘泉。奉車金吾共馳騁。外家戚里見招延。徑去平岡馳狡兔。虛彎天際落飛鳶。揭來別館恣行樂。胡姬當爐酒十千。薄暮聊歸渭橋曲。明旦復會黃山前。

天台梵才師長吉在都數以詩筆見授因答以轉句

九閣十韻

九霞凝標倚霄極。爾時師在雲巖側。坐中不起見諸方。滿袖天香嗅薝蔔。海嶠嶙嶙萬佛螺。赤髭半領誰相過。卓錫時攀三宿樹。翻經詎著四圍馳。何年擲鉢來京穀。抱蓬成畦紫蘭馥。王公撤席爭逢迎。不意當今有平叔。第一多聞師子兒。碧雲餘力嗣工詩。盡把天光注言語。真將清氣入肝脾。有人官冷抱窮愁。客坐無氈塵影流。吃口倦談真寂寞。移書避事喜旬休。愧慙禪嫡來相問。刮目探懷授珍蘊。已輕安石爲老生。更惱王筠賦強韻。比來緇侶言頗文。局促調嗽寧足論。私地蛙鳴徒聒耳。長沙國小僅回身。惟師墨海

多雄藻。具足身中無欠寶。先追禦寇跨冷風。後伴騷人拾香草。跂子投報乏瓊瑰。日睇金園剩九回。鑿鑿
嬾嬾兩生舉。定容元亮醉中來。

謝提點刑獄李郎中贈扇

規裁珍素裂輕雲。柄剪春篁燥叢露。製以爲扇持贈君。拂君懷袖祛君暑。蜀天六月苦炎歊。赤龍秋秋駐
雲霧。火走膚脉汗若流。暗逗浮涼下天宇。畫作飛蠅緣誤點。徐隔游塵不成污。何以爲報我知之。奉揚仁
風慰黎庶。

詠西湖上寄潁州相公

湖邊烟樹與天齊。獨愛湖波照影時。崖蔣渚蘋春披靡。佛樓僧閣暝參差。相君萬一來湖上。手弄潺湲更
憶誰。

和賈相公覽杜工部北征篇

唐家六葉太平罷。宮豔醉骨恬無憂。阿瑩話天翠華出。模糊戰血腥九州。乾瘡坤痍四海破。白日殺氣寒
颼颼。少陵背賊走行在。採椽拾橡填飢喉。眼前亂離不忍見。作詩感慨陳大猷。北征之篇辭最切。讀者心
隕如摧軸。莫肯念亂小雅怨。自然流涕袁安愁。才高位下言不入。憤氣鬱屈蟠長虬。今日奔亡匪天作。向
來顛倒皆廟謀。忠骸佞骨相撐拄。一燎同燼悲崑丘。相君覽古慨前事。追美子美真詩流。前王不見後王

見。願以此語貽千秋。

羅承制自戎州罷歸

乘障一麾速出守。終更三歲今來旋。巴雲晨趣東北道。楚月曉背西南天。故人把酒數卷白。離亭贈柳長于鞭。屬羌羈詔久款塞。歸爲天子細論邊。

高亭駐眺招宮苑張端臣

蜀天向臘寒未極。倚檻綿睇亭臯分。一萍團紅江上日。數葢淡白樓頭雲。杯中竹葉與誰舉。笛裏梅花那忍聞。願君枉步數相勞。他時離緒徒紛紛。

嘉祐庚子秋七月予還臺明年始對家圃春物作

十年去國老蒙召。今歲始見家園春。雙燕初來卽賓客。羣鶯相逢如故人。蒙茸草樹延野色。碎璫鮭菜供盤珍。多慙吾黨共醒醉。收得澤邊憔悴身。

登齊雲亭

少城西北最高處。憑檻極眺襟懷開。模糊烟樹鳥邊靜。突兀雲山天外來。歸櫓櫓櫓逗淮浦。涼颼獵獵生巖隈。雖非吾土信云美。伴客留連傾一盃。

景文集卷八

五言律詩

太廟侍祠雪霽有作

喜雪靜氛埃。繁雲卽日回。清光動冠劍。餘素著樓臺。樹雜瓊枝竦。途平玉轍開。惟應餘兩騎。知是海神來。

和吳侍郎朝謁天慶宮

上路鳴騶遠。叢霄故館開。華簪堯豸出。輕舄漢鳧來。探妙雲敷笈。蠲煩露溢杯。直須重締約。飛蓋一徘徊。

後苑賞花釣魚應制

清籟披蘭路。雕輿眷蕙辰。漢池平浴日。溫樹暗留春。樂石來威鳳。恩波上翠鱗。成文傳睿唱。廣曲徧華紳。

元會詩

寶典叢三朔。中闢闢九閭。羣臣深拱寧。列仗儼屯門。輦出東房祕。辰居北極尊。熊羆連案負。日月傍旗翻。

奉和聖製清明日

璇杓臨乙位。羲御屆婁初。碧浪桃花湧。珍叢錦段舒。輪蹄晴縹緲。鐘漏夕虛徐。穆穆宜溫殿。披文日有餘。

晨赴書局

上直蓬山遠，輕軒截九達。曉光銜睥睨，秋色靜罽毼。漸覺蘇裘敝，行嗟潘領衰。鷦鷯自有志，不羨帝梧枝。

和道卿舍人奉祠太一齋宮

素秋來藥館，瑞祝達霄晨。蘋薦祠無饌，樓居地不塵。擲波琴鯉樂，傍峙漢雞馴。此際清懷極，盈杯沆瀣津。塵氛不可到，深注五城樓。素瑟少今韻，仙春無俗秋。晨杯三秀潔，夜檠九光流。順報通霄極，紛綸瑞福遒。地占叢霄勝，人持禁橐來。詩長清夜徧，祠罷素秋回。爽籟天中發，虛絃月際開。無容以風解，身自到蓬萊。

和天休舍人奉祠太一宮見寄

順祝齋琳館，翛然隔世埃。空歌靈鶴下，祠節寶雞來。瑞木千尋竦，仙圖幾卷開。如無清夜唱，誰識帝車回。

玉堂感舊

七年辭玉署，再入佐黃扉。樹與青春換，人將素領歸。塼花仍可記，廈雀稍驚飛。爐薰非無意，逢人尙襲衣。

旬沐二首

薄潯還私室，陶嘉屬小園。筍餘林響密，花後果初繁。燕口將泥重，蜂脾抱蜜喧。此時蕭散意，都欲忘乘軒。

待詔官非急，還家體不勤。里無休汝騎，牕有上義人。密樹稍迎夏，晚花猶及春。幽懷誰與晤，杯酒強相親。

學舍直歸晚霽三首

驟雨挫炎威，歸軒廣陌西。渠聲流作瀑，日腳側成霓。換錦龍媒埽，淹花燕子泥。比來巾角熱，李郭定相攜。

雨罷殘陽在。風微酷暑收。餘昏淡雲翳。聚沫泛河流。桃簾雙紋展。盤瓜五色浮。潘郎最多感。庭樹莫先秋。密霧披層市。濃雲霽四溟。亂流初漱玉。紅日不藏萍。萬葉張晴幄。千山卓翠屏。無煩事鏡吹。蛙響自堪聽。

赴直馬上觀市

上直驅羸馬。凌晨望百廛。壚喧滌器市。簫暖賣餠天。流水隨輕轂。翻花送駛轡。區區市門吏。無復子真仙。

初到郡齋

專城四十外。中石二千餘。曠日慙良術。班春賴細書。學情前志忘。身遠故人疎。姑俟天藏疾。雌堂日燕居。省分由來拙。操心本自危。十年今得調。三匝此逢枝。攘臂貪豐粟。裝懷倦訴詞。竹林誰見憶。迢遞始平塵。

初到郡齋三首

暫解樞機任。來從海上閒。浮雲富貴外。一馬是非間。月袞生潮浦。風香墮桂山。蒼生雖繫望。要作冶城還。我里誠云樂。公今況釋勞。秋葦不下鼓。霜蟹恣持螯。林靜來晨燎。江喧入夜濤。功成奮嘉藻。寧欲傍離騷。溫省綢繆罷。鄉州偃息時。鶴情歸不怨。鳳德老無衰。月樹供園蔕。仙囊續宴卮。自慙淮守薄。千里與言詩。

到官三歲四首

芳歲已三換。寵名仍再遷。平生一丘壑。衰晚右囊韉。客眼登樓外。鄉愁把酒前。巾箱多舊賦。只是欠歸田。一忝中山守。仍班第四春。老應無所事。少尙不如人。適野愚謀短。將蕪舊產貧。須慙文二組。羈束最慵身。

儒帥非眞帥。瓜時定幾時。丹心雖許壯。白髮不藏衰。苦密游鱗駭。山遙倦翼遲。歲成無奏最。準擬鴈門騎。塞下靜無事。軍中奚告勞。青山側身遠。白日舉頭高。作奏閒雙筆。流年耗二毛。惟應不能飲。元解讀離騷。
王孝伯曰。能痛飲酒。讀離騷。可爲名士。

穎上唐公張集仙相勞

案張瓌字唐公。全椒人。以翰林侍讀學士知涇州。

去時成恨恨。喜見眼中人。共束西崑帙。唐公與予同書局。又相次得郡來。都爲左虎鄰。年華衰意早。酒所故情親。後日孤舟遠。離懷怯重陳。

同張子春淮上作

南風今日好。歸棹上淮津。川迴舟如葉。山遙石似人。波光篙底動。沙壘漲餘新。誰信機心少。溪鷗伴此身。
思歸

去國條三歲。頗知歸思紛。南心曉城斗。北眼暮樓雲。珥筆行將脫。朝珂冷不聞。莫論持帥節。畎畝尙思君。
有詔換淮陽

比出淮陽守。今移襄內州。眞無弱翁治。只是茂陵求。換節矜新假。循襟釋故愁。桑榆知未晚。前失庶能收。
次江都

道險疑無地。巖高欲近天。家收代田粟。民耕山上。一代官鑄卽山錢。山多鐵冶。州鑄錢。雲變陰晴候。林容旦暮烟。落花

真有意時解拂行轡。

江溜灘灘急。崖腰棧棧新。天深罕見日。路險不容塵。遠草黃綠綠。幽花落漠漠。逢津何必問。夫我自知津。齊雲亭晚矚

山暝日云稷。天清風淩和。樹花紅暗淡。城草綠坡陀。歸艇衝烟去。昏鳥接翅過。年華無限樂。判作是狂歌。惠民隄河晚矚

遠水同縈帶。聯隄類築垣。行舟壓天底。臥木擁沙痕。魴鱖逃空罟。鳬鷺泊迴村。層波真可羨。由此到都門。九日至衛南

良辰獨據鞍。節物強相干。酒駐衰顏淺。風吹客帽寒。暫吟非有屬。倦曲不成歡。多謝黃花意。還如故國看。鄭子產廟

不知東里叟。遺跡但堪尋。語愛東家淚。論交季子心。故墳猶有石。遺鼎遂無金。謬政爲邦久。千秋謝所欽。

疊嶂樓

州城北城上可望孤射霍山

霍射盤西北。高樓勝覽井。景閒思謝守。名重擬宣城。宣州疊嶂名在天下天闕雲來緩。風微鳥去輕。客憂銷更有。須

到此中傾。

去鄭暮次中牟

暮投京縣宿，氣象已紛羅。苑樹道旁密，侯田關內多。高城切星斗，秋水似天河。自問還臺馬，猶餘幾子珂。

廢鄧河

民問呼此名，或曰即古洧水。燕塞惟春夏汗潦所集。

當年食溱洧

鄭國語主菜，馳而食溱洧。

此地控長津，卻見爲陵日。難尋病涉人，落霞遙送鵝。荇草暗留聲，代往詩風變。

田渠數報春。

宛丘作

宛丘眞善地，承詔幸班春。鈴下聽無訟，日邊來有人。吟餘多感客，睡足本慵身。蟻蝨休相賀，吾今湯沐頻。

望漢江

西導岷源闢，南浮楚望開。弄珠嫌蚌隱，投璧讓蛟迴。岸翠山烟逼，波紅日影來。萬艘徒擾擾，誰是濟川材。

次劍門

昔驅千騎往，今解五魚還。誰憚老銷髀，自憐生入關。春風來迴野，曉斗掛空山。卻整康成帽，依然愧賦顏。

隴州魚龍川石魚

纖鱗藏介石，物化自何年。無復西江水，長依東海田。苔紋堪代藻，雲葉卽成蓮。琥珀藏蛟影，佳名共此傳。

次梓潼

行行芳序深，秀色媚諸岑。早葉易經吹，暖雲難久陰。擁條孤狖嘯，戲荇一鳬沈。不是無樽酒，其誰共獻斟。

張亞子廟今封英顯王

偉哉眞丈夫。廟食此山隅。生作百夫特。死爲南面孤。鹿庖償故約。雷杼驗幽符。滴水無時腐。英名相與俱。
敝俗

陶姚民屋富。梁魏敵風存。士闕游卿校。人爭倚市門。椎埋時結客。博掩競成喧。誰與遷荼堊。移甘撫臙原。
城外

次舍梁陳外。風烟周鄭間。徐驅四郊路。徧識屬城山。野雪融殘素。岑霞就暝殷。幾宵星影動。知伴傳車還。
題蜀州修覺寺

蜀嶂紛重沓。祇園隱寂寥。花供法界雨。江助梵音朝。海水聞鐘下。天風引磬遙。少陵佳句後。物色付吾僚。
杜子美詩刻今在

巡視河防置酒晚歸作二首

古戍連沙曲。層阿屬岸隈。天長倦鳥沒。山晚跛牂回。斜日低官樹。輕寒犯客杯。還城聞暮角。三疊落江梅。
夾石雙隄轉。遙遙千騎留。川昏多晝霧。水落足寒洲。岸石危相倚。橋澌暮不流。風烟非渭曲。誰有釣璣鉤。
轉運彭季長學士小集數辭宴集

此日疾爲解。遂將杯酒疎。多愁庾開府。苦瘦沈尙書。倦曲琴檠後。霏香藥裏餘。莫令詩思劇。正是落花初。

比見告中有
詩書感嘆

送張法曹

駛騎柳枝鞭。春遶望雒塵。賦才實在俊。掾諾府中賢。宮楯含櫻密。王渠泛醪聯。勝期資一笑。刑矢措周年。

送呂太初法曹之許田

時相國彭城公鎮許田

秋涯驪客艫。潘鬢不勝梳。去決卿軍事。還親城旦書。驛鷁啼月早。庖鯉躍冰餘。白晳公庭步。翹材首曳裾。

農歌

農歌非度曲。新樂信蚩蚩。迺父知田事。吾王采諺辭。折楊時動笑。鼓腹自成嬉。日暮牛童笛。連聲下遠陂。

初宿東閣追憶文簡丁公作

〔案〕宋史丁度傳度字公雅諡文簡

辭閣玉堂東。依然昔所從。

予慶歷初入翰林公雅爲承旨獨與余更直凡歲餘予以避親罷

舊池空嘆鳳。

公雅歲餘進歷二府

殘友不成龍。制藁流

塵積。塲花駸蘚重。過車三步約。何日醉瑩松。

三司晏尙書西園玩菊

涉園求勝賞。時菊豔秋光。散漫仙潭餌。欒樅瑞鵠裳。酒熏吹晚藥。蜂冷抱殘香。公意周盈感。留杯盡夕陽。

玩齋前菊

高秋玩佳菊。繁采照前除。似粟金無算。爲裳鵠有餘。不甘興惹謗。長免共蘭鉏。爲爾浮罇酒。非邀栗里興。

望僊亭書所見

危軒冠層堞。永日付登臨。寒鴈猶能陣。喬柯自不林。溪流橫趣島。樵路側依岑。西北雖堪望。浮雲易作陰。南國冬無雪。居然氣候迷。柔蔬傲霜甲。幽鳥逆春啼。神鼓聲無歇。樵歌韻不齊。舉頭看白日。還過太山西。

和楊學士同晏尚書西園對菊

歲秋無異卉。佳菊自成妍。薄采稱觴客。繁開落帽天。抱池閒沮洳。畱蝶小翩翾。爲結胡公賞。并懷酈水邊。
尚書詩有井懷
過舊玩之句

東亭

左圃魚鱗闊。前軒蜃翅開。虹將一雨罷。潮送萬艘來。山淨秋妍露。林虛晚賴回。此時蕭散樂。誰奉醉言杯。

隴西都尉禪會圖

宴場禪集盛。霜幅繪毫工。竺社同開葉。嵇姿宛送鴻。法身霄滯相。世眼願瞻風。廚鑰方傳寶。非專巖壑中。

善惠大師禪齋

丈室傳心地。安閒歲臘除。水能涵寶月。風解去萎花。鵲焰紗圍短。牛香篆引斜。化城無憚遠。門外卽三車。

晚夏北軒

暝嶂霞霏罷。嚴城鼓疊通。梧陰破階月。筵吹亂林風。浩露來無際。明河望若空。玉繩低影處。知是建章宮。

呈胡希元進士二首

離邦嗟病免，道舊樂明簪。刻畫忘齊醜，膏肓倚鄭箴。軒鴻迥霄路，和鶴答溪陰。爲難求羊徑，時容一往尋。

贈罷征邊將

罷征光祿塞，初入玉門關。殘月邊兵盡，寒風壯士還。旗光侵桂卷，箭鏑半星閒。歸賜將軍第，長銘寶憲山。

惠泉

遙源辭壘障，澄派鹽晴虛。流迅無汾惡，波長盡楚餘。隱之徒酌水，鄭伯謾名渠。不必西江去，憑君起鮒魚。

寄沂州王學士

舊租丞相國，新治使君州。坐樹貪循政，懷鉛倦雅遊。猿驚鄉嶺樹，蜃結海天樓。誰見行春盛，東方最上頭。

途中新歲憶三城兄長和公

馬上逢元朔，忽忽記物華。趁盤呈柏葉，偷筆弄椒花。鵬暝殘晨炬，春暉上早霞。三城今日酒，知我獨思家。

入壬辰新歲

五十爲衰始，仍餘五歲衰。雙眸不明鑑，殘鬢已紛絲。銅虎雖頻剖，荷囊信濫持。何須依老格，新詔七十不致仕許有彈劾先作故山期。

送餘姚尉顧洵美先輩

蓬葆已蕭蕭。從官越絕遙。山圖禹穴近。濤氣伍神驕。臥帳藏新論。舟行問故樵。寄聲時謝我。江上足蘭苕。

送張士安同年赴上元尉

千名聯唱第。一尉滯徒勞。山人黃旗國。江浮白鷺濤。苑葩依日晚。官樹共秋高。少賦思歸恨。潘才是二毛。

同賦飲舫

飲有乘舟樂。舟因得飲名。能招習池客。便載景山鐙。暫擬畱顏玉。徐牽倒醉罍。莫辭沿汜遠。雙楫自逢迎。

閱古堂

〔案〕宋朝類苑韓魏公知定州作閱古堂後
子京知定州有樂歌十閱此首疑即其一

堂皇對岑蔚。歡酌坐怡然。蟹美持螯日。魴甘抑鮓天。〔案〕楊淵五湖賦連沅抑鮓天渚翹幽處鷺。林響靜時蟬。老去興非淺。無妨清夜旋。

胡寅赴明州慈溪尉

久困天官調。東南亦第如。客篙新溜急。春樹雜花餘。越臈豐池鳴。吳袍競庫練。還音與歸夢。併附澗江魚。

孫景赴懷寧尉

一行爲吏日。千里背淮人。蘭助朝昏膳。絲垂宛轉綸。雲容侵驛曉。江態引帆春。靜治龍舒邑。鼂生盜向秦。

送王鼎同年尉滎陽

氈毫聯署榜。蘭酒悵離杯。作吏緇衣國。工吟白社才。浮涼御風至。澄翠溢榮來。盜息連殊課。章封刺吏臺。
奉節朱尉

初命東南尉。征途上下弦。傳家萬石貴。結綬半綸鮮。邑籍饒岷芋。公囊滿郢錢。仙才今有助。銘閣待新篇。
送靜海勾稽高洎

豪雋殘試墨。綸綬照恩裳。沿牒天官調。承家父任郎。曲長溪舫遠。宴密酒螯香。得助江山國。仍縫古錦囊。
送倪敦復朝奉

倪侯喜清曠。遇物乃虛舟。富貴知輕視。胸懷肯誤投。青雲非近器。滄海納羣流。道在從藏顯。功名晚可收。
寄王其

湧蟻雲壘溢。離鷗雪苑開。吏催東府計。卿待楚人材。舊隱周蘿月。前期禹鑿雷。我慙芳歲晚。猶俊蹇修媒。
寄葉道卿

懇乞東南節。貪榮綵繡衣。禁中嚴助往。江上子牟歸。併覺秋蓴美。時驚夜鶴飛。遙知具雞黍。日與故人揮。
秋霽二首

曉河迴北陸。夕雨淨西郊。水足魚忘煦。林寒鳥戀巢。開苔浮綠暈。社橘老丹包。誰與同真想。清風是淡交。
氣爽無餘暑。天高不住陰。霞殘仍是綺。風冷卽名金。烟沼雙魚樂。霜郊一鷄心。此時靈運唱。無復答愁霖。

玩晚菊

佳節雖云晚。繁英尙獨開。新醪相伴熟。寒蝶不空來。細折愁香破。長吟恐暝催。自嫌霜白鬢。將插重裘哀。

殘秋霽景

霜晏初畢雨。日氣上熹微。寒水流無急。高雲薄未歸。書閒仍積簀。琴燥乍移徽。負郭泥妨轍。翻勞急掩扉。

冬日呈應之

〔案〕應之即吳感。吳郡人。

賓席滿浮埃。勞歌倦撫懷。囊風寒薄木。鵲雪夜平階。莊室虛仍白。顏心靜已齋。北山如借問。矯首謝丹崖。

秋夕不寐

械械始遙夜。騷騷無寐時。啼螢思歲晚。寒葉伴人衰。白髮生將遍。丹砂化苦遲。多情是殘月。通曉共遙帷。

冬日野外

霜郊堪極目。萬籟共騷騷。遠水無窮綠。寒雲自不高。候鴻差入渚。田雀短翔蒿。歲稔期民阜。中田饁凍醪。野迴人來少。天平鳥去長。魚梁四寸罟。樵市王家漿。谷轉留寒霧。霞休罷夕陽。不須教目極。卽是到迴腸。朔吹低凝野。層陰迥匝天。葉飄霜外柳。烟出燒餘田。嘵嘵流芳後。嶢嶢急景前。平生魚鳥志。寧免爲留連。

行春野外

綠野陽膏動。春旗出曉衢。川長羅後乘。林轉隱前驅。早藥紅粘杏。輕苞紫綴榆。桑郊不敢問。直爲使君愚。

贈文雅度大士

高臘頽髭霜，棲閒寄寶坊。祕園金側布，薰夾字旁行。賜服恩華重，分燈祖意長。祇陀學久徧，餘力在雕章。

守歲

已覺新杓動，猶聞促漏餘。夜寒窮臘尾，春色併年初。事往成追計，身羈況索居。明朝爲壽酒，無奈故人疎。

景文集卷九

五言律詩

歲晚私感

已嗟官落魄，更值歲嶢嶢。一畦區中累，千慙谷口耕。休文偏恨瘦，夷甫太鍾情。借問長安米，侏儒有底榮。

送同年葉文卿尉高郵

檜櫂艤河滸，東南再命新。還家倦游客，隱市謫仙人。驛舍霜梅早，鄉壺蟻酎醇。時君復過若下家墅疎林搖落盡，持底贈蕭辰。

春晏病體少惊退臥北齋有寄

小有負薪疾，早成憔悴姿。無人來迂跛，賴酒與扶衰。樸斲知林短，腥膻厭席卑。西山一九藥，何忍獨相遺。

殘花

林下感餘歡，流芳逐雨殘。香歸蜜房盡，紅入燕泥乾。夢短休成蝶，腸迴卻掩鸞。故應成異果，持去擲潘安。

王秀才贊賦乞詩爲別歸毗陵

矩步敵長裾，清漳訪病夫。得交欣鳳舉，賞賦怯霓呼。道勝稽論秀，人遐亟去都。一篷江上雨，歸思滿菰蘆。

春郊曉望

睡足猶欹枕。歡沉卽掩樽。風花飛有態。烟絮墜無痕。野色兼山遠。溪流漲雨渾。淵明有歸意。惟是對桐孫。

送王識游洛陽

上京漫客刺。西道摻離裾。天倚呼嵩外。川橫鬪穀餘。敝襦琴晦軫。行笈簡聯書。卻見槐花候。期君促計車。

僑居二首

抱病苦幽憂。都城困勸游。身拋禿翁版。言入稗家流。世路風波惡。天涯日月遒。危心正無泊。持底喻窮愁。

公宇靜寥寥。居然俗意銷。展閒誰記齒。帶適自忘腰。敵首秋殘稷。城西日暮樵。比來行樂熟。隨意度溪橋。

春晏北園三首

春物在無幾。景隨人意閒。筍生迷塢缺。花盡失林殷。墜絮來何所。輕雲久未還。持杯問流照。肯信有朱顏。

天意歇餘芳。人閒日始長。落花風觀閣。睡鴨雨池塘。稍倦持螯手。猶殘婪尾觴。春歸無所預。羈客自迴腸。

日晏休塵慮。中園眷物華。驚禽曳啼去。弱柳受吹斜。暝早月沈碧。涼生水進涯。悠然望層堞。千翅度昏鴉。

屏居寄獻侍講孫尚書

僑版農塵陌。飛灰歲瑄周。危疴負薪困。生事播精求。雨露遺幽谷。乾坤占一丘。惟餘道邊樹。獨爲報春遊。

和丞相小園雨霽

霽碧凝天宙。規紅轉日車。鵲輕來燥枿。蜂濕抱寒花。林果高仍在。菰蔞晚自嘉。須知窮僻處。要是鄴侯家。

送人歸衡陽

別曲慘鵲雞。沿湘望翠微。人從南浦別。客向洞庭歸。曉鴈并蘆遠。宵禽負葉飛。還家落秋後。社橘老金衣。

松

冒雪虬枝密。凌空麈影勻。葉傾秦帝雨。華老宓妃塵。不見棲鸞客。多逢繫馬人。寄聲遭匠石。千尺謝輪囷。

聞蟬

秋風日夕驚。庭樹喝蟬聲。衰意先鶻馱。繁音伴沸羹。斜陽掛高柳。落日淡遙城。此際君懷苦。非徒客子情。

聞蟬有感三首

初聞蜀樹蟬。含喝晚風前。便把淒涼意。催成搖落天。易驚惟遠客。所得是流年。空腹悲何事。繁于五十絃。殘蛻拋何處。新聲集迴枝。歲芳鵬後妬。露信鶴前知。風塢嘶清御。霞梢咽暝規。此時兼一葉。併助長年悲。勞君驚暮節。助我思流年。嘒若橫吹管。繁如未破絃。城殘嘶外月。林暝噪餘烟。塊坐秋風裏。潘郎鬢颯然。

遠行

平原已超忽。山徑亦紆餘。匹練迷征馬。孤蓬伴客車。江楓極目外。隴水斷腸初。行行不顧返。秋露沾人裾。

夜緒

炎氛歇層寓。清氣肅重帷。纔遠天人雜。宵閒甲乙遲。漢制有甲乙至戊夜江湖牽客慮。日月與人衰。經國謀安在。悠悠空我思。

幽禽

已伴傳書燕。休隨匝樹鷦。春鳴變高柳。暮散落餘花。格磔林烟迴。啁啾觀月斜。寧同七十二。鎮在莫愁家。

集江瀆池亭

五月追涼地。滄江剩素漣。林烟昏午日。樓影壓池天。篠密工迷徑。荷欹巧避船。機忘更何事。魚鳥亦畱連。

出郊

茂草平堪藉。長楊綠自垂。郊晴艾帳遠。橋迴轡車遲。有鶴迎飛蓋。無蛇賭賜卮。秦樓何用識。馬尾結青絲。

清暉亭

亭外大江流。亭前萬里舟。春波賦別地。秋水送歸愁。客路風烟闊。年光日月遒。瑤華何所爲。從古伴離憂。

不言

不言非巧宦。要是乏高符。託社天教散。爲公谷與愚。桂枝懷隱樹。荆葉戀歡株。榮路多高足。爭傳八列呼。

朝天嶺

天嶺循歸道。征旗面早暾。灘聲逢石怒。山氣附林昏。谷轉如禽哢。塵交作馬痕。萋萋芳草意。無乃爲王孫。

讀張巡故事

叛將闕華日，英臣死節年。城當勁兵處，人甚綴旒然。直木摧貪隧，長隄制盜泉。羯塵雖覆馬，不污沛南天。
兔

脫兔馳岡地，飢鷹厲吻天。爲煩麋狗顧，遂給獸人鮮。狂目兼槐落，驚毫共月捐。可嗟多狡穴，歸肉助庖羶。
江休復潞掾

君家能賦別，釋褐重凄然。客袂移縑素，離杯並聖賢。坐曹煩折獄，奏牘竚懷鉛。十載青袍困，須饒草色鮮。
同年李宗太平法掾

俊名參吏啟，掾事補編堂。盡取黃金酒，重紆碧鶴裳。佐庖鮭菜厚，束帙祕廚香。認得公庭步，髭鬚白暫郎。
答安陸龐掾

囊文管奏御，軍事此參卿。座隘升堂友，鄉榮乞墅甥。清言飄塵毳，慎疾褰芝英。談幄尸官久，煩襟怯報瓊。
出城暫憩林下

下馬清林下，翛然忘俗情。山禽不辨種，溪草盡無名。露笋披斑箬，風葩抗紫莖。徘徊漱巖溜，未忍濯塵纓。
林下

林下追涼久，山西反照初。蘭苕香自怨，蟬腹飽猶虛。李暗傾冠外，葦殘折屐餘。蕭然臯壤樂，何必羨池魚。

南國

南國豪華地。東風駘蕩天。露闌薰夕夢。烟柳重春眠。歌斷雲空度。書長燕未傳。吟成休自許。芳草更緜緜。

送輩漢卿同年赴五原理掾

再赴天官調。仍還多士鄉。華陰餘霧散。光祿故垣長。春柳侵湖綠。秋雲際幕黃。片言民訟息。編美冠州堂。

馮彭年蘇州法掾

竹箭征艫駛。驪駒客袂分。倦游銷仲產。參事厭卿軍。象闕天中隔。鄉朝月外聞。西山朝氣爽。拄頰待談雲。

吏上

吏上重門輪。樓喧疊鼓撾。翠沈遙嶺樹。紅斂暝殘花。杼促蟲聲急。眉拖月魄斜。煩心銷熱盡。不待鎮嘉瓜。

曲幌

曲幌囊風入。前軒峽雨收。醉羅初解夕。珍簟暗知秋。衰柳金城恨。幽蘭楚國愁。更堪聞短笛。珪月在西樓。

林缺

林缺榛苞綻。溪平芡芡開。衰烟稍僻柳。寒雨併饒苔。天意淒淒早。鄉愁袞袞來。此時論四戚。方驗楚人材。

送朱十翁

手把臨渦酒。人歸如夢城。何言一歡笑。便作兩離情。園樹丹蕤老。家山鈿髻明。不妨還慘促。芝崦趁春耕。

司馬相如琴臺

故臺千古恨。猶對舊家山。半夜鸞鳳去。他年駟馬還。死憂封禪晚。生愛茂陵閒。惟有飄飄氣。仍存天地間。

黃孝基歸上饒

街微曙。簾喧。行人岸。艤船。杓星背城隱。萍日過江圓。霧晦書囊竹。塵昏劒室蓮。他時漢廷用。未減賈生年。

送謝處士南歸

歲晏心無著。時清遁更肥。江蓴縈箸滑。海鳥傍帆飛。鄉思生閩霧。吟懷入楚霏。趨庭多令子。綵服間荷衣。

登望臺

年華無限景。況復上高臺。曉氣先明樹。春寒不著梅。幽禽仍早囀。戲蝶卽雙來。此地流霞意。同誰一酌杯。

連秀才東歸

烟樹徧雲中。迎君馬首東。鳴雞關下曉。歸鳥漢陽窮。勸客辭城闕。深耕託灌叢。還將數日惡。故故惱衰翁。

謝安曰。中年以來。傷于哀樂。與親友別。輒作數日惡。余年踰三十。多難早衰。竊用自況耳。

徐帥北歸

舊國青山闌。仙巖綠桂春。金壺柱史客。玉札上清人。學霧應成市。冷風肯待旬。他年畱半劑。牝谷願凝神。

北歸

一水清波駛，還將檜櫓歸。纓綏成素濫，猿鶴恐長違。斗外城隅出，雲端闕影微。定知朝夕鳥，卻望漢臺飛。

宣徽太尉鄭公挽詞二首

祕幄留高議，雄邊倚茂勛。風流自南國，禮樂得中軍。臥疾初無損，遺忠忍遽聞。寢門今日慟，長作死生分。誰爲云亡恨，曾無可贖身。江山歸國路，桃李泣蹊人。追冊君恩厚，題功史筆新。所嗟經濟事，不及相平津。

肅簡魯公挽詞四首

〔案〕宋史：魯宗道字貫之，諱人參知政事，即魚頭參政也。初謚剛簡，改肅簡。

拂世謨謀盛，端朝載采熙。上前推汲直，天下詠曹隨。密啟多焚草，加飡屢嗜葵。不圖霜露疾，奄忽喪元龜。震邸陪翔鳳，天壇侍祭牲。參謀大丞相，別對小廷英。上棟方隆國，頽山遽奠楹。武公年不至，輔德是功名。憂國神無愛，呼醫體寢靡。人憂一臺坼，帝遣兩騶扶。臨視回襄御，遺言入舜謨。七兵榮贈冊，沉礎賁龜趺。密勿千齡旦，生平三命恭。承家男得鳳，擇壻女乘龍。鄭邑窮遺產，邢山下素封。空餘弔客淚，傾海望長松。

王沂公挽詞三首

盡瘁辭當國，均勞得假藩。幄中留祕畫，天下滿危言。日企還三事，寧圖闕九原。誰將河海淚，一灑問乾坤。下閣成憂疾，飛郵走詔醫。遶鴻徒望渚，浴鳳不歸池。宣室君朝罷，剡車客涕垂。正應廊廟上，畫一奉蕭規。嬰路風號野，松阡水溢榮。滕君今見日，傅魄上騎星。詒訓金籙滿，圖功籀史青。空嗟令君坐，千古掩餘馨。

卜居

自樂顏居陋，非論晏市囂。西山宜託疾，東路便歸樵。穴邃狐情樂，巢完鳥意遙。居然深隱去，寧待左生招。
太冲有招隱詩。

訪隱者不遇

青蘿白石扉，霞薄動春暉。鶴去書空在，鳥閒鳥自飛。驂鸞僊馭遠，出岫昔心違。拂枉雄風動，猶疑禦寇歸。

退居五首

干祿非三釜，躬耕戀一丘。才無作奏巧，窮有著書愁。雀噪門羅晚，蓬飛鬢葆秋。平生鷗鳥志，未去戀滄洲。
貧極非關病，憂多信自傷。悲歌一頃豆，驚饋五家漿。擁耒宜耕石，沈鉤豈爲璜。中林環室在，開徑望求羊。
昔愧公車牘，今投海岸簪。逢齋還忌熱，居陸更憂沈。楚岫偏藏玉，燕臺豈乏金。前途見楊阮，只是有沾襟。
利固慙龍斷，長非累纆牽。難求迎鮒水，空望戴盆天。喘急常悲月，驚多遂惡弦。誠非窮者歎，民頌正堯年。
勇退方藏密，營生信有涯。千株素封粟，五色故侯瓜。虞骨誠非媚，潘毛故易華。履穿誰復問，新進競青緇。

詠苦

雨牆蒼葦合，烟渚碧紋通。賦閣并塵掩，詩階伴藥紅。萍流煩結實，絮亂枉因風。少閤回腸恨，春閨隔歲空。

南齋二首

隱有山林願，閒非江海身。孔書罕言命，莊意閒同人。敢銜能鳴鴈，須慙不獵鶉。緣何無麗句，多病極漳濱。

曩官緣三釜。今歸一分丘。杯棬非柳性。塗尾是龜謀。薪意矜來仕。瓜名託故侯。恍然桑下計。蠹妾詎相尤。

哀故文節公

〔案〕宋史列傳。張知白諡文節。

早傳黃石系。未伴赤松遊。暴疹驚牀蟻。深恩賜養牛。谿璜俄碎玉。川楫遂藏舟。蕭相今無嗣。夫人紹鄴侯。順采思忠盡。宣謀歎巧勞。慙遺無一老。投弔剩三號。撤奠哀笳引。追榮斂袞褒。欲知憑厚慶。弟覽得傳刀。霜露纔嬰疾。龍蛇已喪賢。神騎尾星次。家託癡丘田。長樂申君弔。東堂罷襖筵。佳城白日掩。從此卽千年。

章靖馮公哀詞

華殿推名學。南宮重亞卿。心無二何佞。身有兩龔清。歸沐賓綦鮮。幽通筆思精。邦人爲公恨。不見相承平。讀易三編斷。當朝萬事知。由來不語怪。何意遂無兒。酒德歡長絕。書林業尙遺。異時逢玉尺。方爲阮咸悲。皖簣綿疴革。中楹奠夢還。絕儀猶在野。書副卽藏山。友醇生芻潔。君恩刻印頒。一朝交臂失。寧復易睎顏。風旌引素輅。歌紉遠猶喧。此路成千古。何人歎九原。未亡鍾淑儷。不朽寄空言。兄子今爲後。春秋無餒魂。

光祿葉大卿哀詞

八十浮齡盡。三千去日長。叢闌秋寂寞。卿月夜蒼茫。里友歌迎紉。州民酌續漿。英魂知所託。橋梓藹成行。偃息朋三壽。生平定四知。鄉人榮衣繡。光祿號能詩。未赴安車召。遽成埋玉悲。方珉紀遺愛。無誑冢中辭。

辨才少白師歸天台

壤色擁行肩。南方應有緣。歸艤素車浪。寶屐赤城天。宴樹春園密。談花晝械鮮。憑師無闕智。呵黜二宗禪。
自南北異宗學者多尊師授以喪祖意惟仁者尙圓成一案耳。

懷滕祕校書

解職青袍困。驚年素髮多。囊中彭澤米。門外下邳羅。露鶴驚霄島。風蜩喝暝柯。此時潘簟冷。爭奈近秋何。
送黃祕校書

妙齡看試牘。共嘆俊登壇。十載重來調。猶參軍事煩。吳艤沿迅溜。京炙伴芳樽。東觀他年選。當求江夏孫。

景文集卷十

五言律詩

公會亭

日下炎氛歇。風生涼意添。樹花閒纂纂。樓月靜纖纖。倦綆仍垂缶。昏鈎半上簾。哇瓜已堪摘。納履自無嫌。吏罷得休沐。襟懷蕭散中。靜時飛蝶夢。閒處上皇風。稚篠因依碧。疎花礫索紅。素餐無所事。天幸一衰翁。

和小飲

天霽暮雲消。飛觴夜正遙。洛吟聊擁鼻。陶舞惜廻腰。露曉蟬嘶樹。河秋鵲映橋。客歡殊未幾。離恨又霞朝。

夏日江瀆亭小飲

飛檻枕溪光。歡言客徧觴。暫雲消樹影。驟雨發荷香。辛白橙齋熟。庖刀膾縷長。蘋風如有意。益衺借浮涼。

朝陽

縮宿沈榆彩。滄溟轉若華。纔晞漢盤露。便映洛神鴉。鳴鳳梧岡迴。桑柔桂館斜。照梁休自許。城上已啼鴉。

唐李衛公廟

斯人天挺傑。賊膽畏膏肓。疾戰江陵破。長驅頡利亡。成功在不伐。垂烈付無疆。血食雄京輔。于今異姓王。

夜出溪上

隴首孤雲斷。均塘綠水周。螢光不欺夜。蟲織自悲秋。早鴈離離度。歸舟泛泛流。蒼蘚共搖落。底處是忘憂。

秋晚溪上

積水增波潤。蒼霞變露餘。斷煙隨鳥遠。寒葉向人疎。萍老猶迎日。蓮衰尙戲魚。臨川方病涉。誰借鄭卿輿。

出城所見賦五題

二月雨堪愛。霏霏膏澤盈。添成竹箭浪。催發杏花耕。迴濕風頭冷。微含日腳明。居然嘉應在。誰是東長生。
二月水堪愛。泮流清復渾。影深天在底。紅亂日搖痕。驚沒小舟度。魚唱新藻翻。有人無限思。慚愧仲長言。
二月花堪愛。全開未落時。香輕長抱葉。霞破卽團枝。舞蝶何曾定。流鶯不待期。勞君金縷唱。更盡拍浮卮。
二月草堪愛。一番芳意還。遠迷天泱泱。低隱雉斑斑。細雨鮮原潤。東風古道閒。王孫歸定否。持問桂枝山。
二月風堪愛。悠悠天際生。向空鳴籟細。乘暝作寒輕。拂水紋層浪。穿條杙紫莖。煩君期素魄。相伴倒春清。

重葺敝廬有作

屢市喧卑極。家林改築初。藩傾猶置筆。櫺破尙逢書。徑草臨江府。園畦洛涇居。憑誰遣真意。仁義亦遺廬。

華州西溪

在路左百步

山近重嵐逼。溪長匹練分。霽波平撼日。寒崦側藏雲。溪側有松崦中隱佛祠弄荇魚差尾。投汀鷺列羣。如何去尋丈。

塵路已紛紛。

送客

西出都門路，橫參送客鞍。低雲能作暝，輕吹不成寒。天勢高無極，原姿秀可餐。長年傷別甚，作惡叵能歡。偉宗在蜀諫，官孟昭圖上疏言。田令孜屏書不奏，沈之蝦蟆津。詩人鄭谷傷之，略曰：徒將心許國，不識道消時。予欽其人，作詩投弔。

密疏卽儲胥，指言刀鋸餘。難排趙高鹿，竟葬楚江魚。憤魄棲長瀨，冤氛犯太虛。無人扶君目，他日見誅除。

李九言寺丞知懷安軍金堂縣

雲棧馬蕭蕭，銅章庇邑遙。晨暉碧雞路，春色錦官橋。美政方宣布，斯人舊富饒。早須飛兩鳥，歸趁漢家朝。

挽張元常葬母夫人二首

象服流恩貴，輕輿就養榮。新成大家賦，經餉穎封羹。過隙誠難駐，藏舟自不驚。子賢能順禮，三月祔佳城。嬰病曾無苦，期頤未滿年。風酸吹棘地，露泣採蘭天。庀具藏分澤，張琴委暗絃。江流終不竭，懿範此俱傳。

遣吏視諸公塋樹回有感

文正王丞相

〔案〕宋史列傳，王曾諡文正。

兩朝推巨德，萬務罄斯猷。漢日左右手，堯年忠孝侯。名言天下滿，故事省中留。宸篆旌碑首，刊文又幾秋。

予作碑陰述其事

文靖呂丞相

〔案〕宋史列傳呂夷簡謚文靖

慶歷公三人邊陲擾太平

啖金眞間敵

撓呼高反

酒不寒盟上印情雖切

公被病求退不許

然髭病遑輕上剪髭病服之病

愈

惜哉天弗憖宸幄淚先橫

公計至在上在崇政殿聞之對東府長慟

宣獻宋公

〔案〕宋史列傳宋宗朝參知政事謚宣獻

昔去勸明辟

明肅朝公勸還政

俄歸參大鈞公孫未及相諸葛已傷神名待天淵蔽文爭日月新英魂同玉樹不

向土中春

文惠陳丞相

〔案〕宋史列傳陳堯佐謚文惠

巖廊號元老禮數盛中台萬石父子貴八元兄弟才新詩玉可扣奇隸鵲爭回今日看碑字眞緣灑淚來

答客

賤子空虛甚何煩跪自陳摧藏不鳴鴈排迓後來薪櫛短三秋髮途奔四海塵安能得所欲況是數奇人

送同年吳穀尉烏程

琴瑟報曙天歸趁越人船闕月長留夢吳門自是仙漆書多汗竹圭祀有名田剩著凌雲賦囊帷待奏篇

送王庾

土甌殘炊黍。津航促扣舷。雲迷孝王苑。星認太丘躔。破瑟弦鷗舞。吟囊錦獸鮮。晚淮他夜月。離思共娟娟。
捲客衣空化。求知刺欲漫。孤飛回鷺路。別淚溢蛟盤。待舉秋槐老。承顏夏枕安。新篇時寄我。魚信接長瀾。

送祝熙載

昔誓繻仍在。今行綬已新。春鶯得遷友。夜鶴怨歸人。君便道家山。故及斯句。倦枕低潮月。征帆截渚蘋。清時偏樂職。

寒鼈佐吳醇。

寒食日送李公佐歸漢東

有客改南轅。春郊駐祖筵。罇寒禁火國。風暖浴沂天。茂草平無際。殘花慘更妍。鹿鳴偕計近。簪盍約初年。

送連庶

之子遠參卿。勞勞千里行。素衣因客變。華髮看秋生。遇鯉頻爲訊。逢蓴試作羹。塵埃半通綬。何地免將迎。

送陳動之

綈帙拋蓬觀。軍牙佐柳屯。伏熊均軾寵。睡貉襲裘溫。睢苑寒雲隔。漁鰕暝鼓喧。帛書無厭數。知有鴈爲門。

送梅堯臣

祖席都門路。秋風滿客衣。臺舟三鷁駛。官鳥兩鳬飛。鄉思臨波遠。離憂傍酒微。不應緣事事。手自廢談圍。

春暉寓目二首

春序條云晚。高臺芳意多。花成風地纈。鳥作暝林歌。樹氣薰繁幄。池文疊細波。夾城歸騎散。煙絮徧銅駝。春意都無幾。還持歡緒歸。游蜂抱蕊去。驚燕失泥飛。風下幡幡影。霞留暝暝霏。既知瑤席恨。不減欲沾衣。累夕大風

乘秋萬竅怒。拂野恣離披。祭烏東門酒。鳴鳶上將旗。有誰樵旦暮。無客賦雄雌。何用呼號甚。枯桑了不知。武安侯

貴甚宮中勢。軒然帝右趨。所貪惟狗馬。甯是學盤盂。驕取武庫地。氣凌轅下駒。淮南他日語。悔不共嚴誅。庭石

嗟爾一拳質。塊生天地中。柱雲蒸作潤。山溜滴成空。松蓋何年化。星槎此路窮。無邀什襲裏。近出朱臺東。感秋

樂事行將晚。華年怯早衰。翻車壯士速。落葉長年悲。別燕風簾靜。驚烏月樹危。播精甯有用。皮骨極支離。秋日四首

短影悠揚日。薄寒慄慄天。林聲蟬后老。陂影鴈賓聯。悽感客自爾。變衰時適然。何須問容鬢。所遇是凋年。客心驚暮節。天意歇餘芳。蓮罷池收子。榴成露罽房。綈袍親故暖。紈扇委空涼。庾信真愁否。仍能用斛量。禁林成宿忝。愚谷負深歸。未識前途遠。容知昨日非。巧勞真物役。靜勝乃天機。君看琴中意。何嘗在玉徽。

秋氣颯然爽。宴居差有情。蠅休几案潔。蟬罷亭臯清。溪水照心碧。雲山刮眼明。其如歲云晏。天地莽崢嶸。
晚發

候鼓遙喧岸。行舟逆上湍。輕煙著波面。斜月罷林端。颯杳颯驚亂。蒼茫葭葦寒。致君何所憚。便道許之官。
曉瀨雖能迅。寒波不復揚。林聲散棲鳥。隄影度風橋。茲歲方云暮。吾行未遽央。病身非汲黯。安敢薄淮陽。
遊海雲寺

十里雲邊寺。重驅千騎來。天形欹野盡。江勢讓山回。園竹濃成幄。樓鐘近殷雷。斜陽歸鞅促。飛蓋冒輕埃。
行藥

行藥徧城闔。仍逢搖落辰。塢風焦粟罅。園露飽梨津。遠水多成浦。高雲自作鱗。七丹無復得。魂斷小山人。
湖上晚囑

湖平潦已收。清興暫夷猶。風舸時搖攬。眠鳧自去洲。荒藤依樹老。殘芡聽波浮。珍重茅山色。蒼蒼到暝樓。
答京西提刑張司封次韻

乞得二千石。終非循吏才。霜蓬根易動。籠鳥翅難開。夢寤慚封邑。
來詩云。疇庸國邑開。此語是夢中做陶得有此非常句。故纔成全章。以見寄陶。
挺仰鉉台。報言殊麗藻。虛附驛筵回。

閏月晦日

春物都城晚，歡遊一倍慵。輕風生樹態，暖日淡雲容。小閣時翻燕，閒花更少蜂。幽襟真瀟灑，所得是無悰。
贈楞嚴舒上人

丈室錦城隈，庭閒地徧苔。飯從香積取，花續少林開。講畫經殘葉，禪宵燭委煤。無嫌一時學，要是暮雲才。
柔上人年八十不出，夜能讀細字。

行年踰八十，安坐布金園。指柏仍餘樹，栽桐遂見孫。巖泉晨自溜，經葉夜能翻。顧我生多病，勞師默遣言。
壽上人南游

拂曉鑾鳴月，迎寒毳擁霞。衆香摩詰飯，五葉祖師花。託宿林枝俯，分風夕影斜。前期逢晤賞，持對碧雲誇。
送梵才長吉還天台

歸緘卷蘭芽，城標拂曙霞。溪行鷗避錫，巖供馬銜花。翠柰經園密，蒼莓渡釣斜。暮雲他日合，相望在天涯。
寄藥山長老省賢

南方有尊者，卓錫戀林丘。演法三千界，多聞第一流。爐烟熏定几，笋脯供齋甌。社約慚成負，霜蓮落幾秋。
訪僧舍

近郭一牛鳴，金園界寶繩。衆花天作雨，千焰佛傳燈。碧柰垂園老，青蓮雜漏凝。病襟多俗物，時此訪南能。
寥寥

寥寥私沐地。索索晚秋時。高樹足危響。寒花無媚姿。遠砧投會急。昏鴈赴行遲。撫物能無感。年華及始衰。

早秋

脫葉驚彫歲。翻車送落暉。蔗漿晨渴減。桃簟夜涼歸。怨月收紈扇。輕雲怯紵衣。沈愁知幾許。帶眼不勝圍。

山中晚春

新火暮春天。窮山寄一廛。晚蘭催酒熟。溪草作茵眠。落絮輕無定。殘花淺自憐。緇帷談久倦。江上問挈船。

早春

春來人暗知。何物驗來時。林暖樹改色。山晴雲弄姿。歸鴻高的的。生浪細差差。老帥非行樂。勸農一駐旂。

避暑江濱祠池

溪淺容篙短。舟移覺岸長。煙稠菱荷葉。霞熟荔枝房。技疊參搗鼓。杯寒十饋漿。便成消暑醉。官事底相妨。

夏日池上

溪流來不近。永日映霞霏。水荇自相繚。汀禽無次飛。頽沙時損路。幽瀨忽藏磯。誰欲留連我。相將日暮歸。

揚雄墨池

即草元所。

宅廢經池在。人亡墨溜乾。蟾蜍兼滴破。科斗共書殘。蠹罷芸猶翠。蒸餘竹自寒。他楊無可問。撫物費長嘆。

秋熱

風物連南國。炎威逼早秋。墮飛波上翼。誤喘月中牛。雲杼衣全解。冰壺渴未瘳。此時班女怨。虛爲素紉愁。

晚冬行園

官舍同山舍。蕭然日杖藜。饑鷗守冰沼。寒齋犯蔬畦。霜逼晴空迥。霞牽晚照低。城鷄棲已定。無事莫驚啼。

過惠崇舊居崇工詩有名于世

人往名長在。欽風歷故居。社殘蓮卽老。園廢柰仍疎。塵憶清談外。雲經合座餘。裴回視齋壁。行草暗殘書。

師善行草書中多自題寫

雖味平生契。懷賢要可傷。予爲郡之年。師之去世已二年矣。生涯與薪盡。法意共燈長。遺畫空觀貌。殘詩孰補亡。本院惟

詩藁數軸神期通一語。無乃困津梁。

和鑒宗遊南禪別墅

鹿園開別墅。牛駕此回輪。花識莊嚴界。林容宴坐人。遠煙時誤晚。靜塢若遺春。共照前溪水。煩師洗六塵。

對月

林梢霞尾暗。海面月華新。一水開天鑑。千金上佛輪。幽巖涵靜桂。潛蚌溢涼津。不必姑山去。翛然自玉人。

月華真可愛。堂上共徘徊。白露方徐脫。清風適共來。蚌津隨照滿。烏闥爲啼開。萬慮方岑寂。愁看雲漢回。
望月

早月始娟娟。西南寥泐天。魄中藏暗樹。輪外上虛弦。傍漢舍銀淺。過雲漏葉鮮。遙知今夜鵲。猶得穩枝眠。
同小姪珪璞溪上汎舟〔案〕祁兄庠有子五人。三早卒。惟充國均國二。人見王珪所作神道碑。此名珪璞。或係小字也。

出郭曉雲霽。泛舟春日遲。詩懷隨物放。酒面任風吹。循岸煩鷗起。看山惜棹移。州人輕此樂。賴與汝曹期。
擬明月逐人來

玉漏催成夜。蘭缸換作晨。併花排綵樹。分月送遊人。醉幕星臨酒。天街露禁塵。輕雷與流水。隨意伴香輪。
月

西顥涼颺度。金樞宿靄收。映波休混壁。入幔且迷鈎。蚌冷侵珠潤。羅疎逼帳秋。風流知不淺。庾令在江樓。
新月

幾宵閒北寢。始見映西樓。曲篆臨鈎誤。殘黃映額羞。桂稀山自冷。珠淺蚌兼愁。巧作纖纖句。纔能喻兩頭。
殘月

陰光隨落宿。有意待朝陽。暈缺灰餘影。潮平鷺息狂。殘兵驕子國。隱語大刀郎。此夜方諸淚。寧能減數行。
馬上見殘月

娟娟天外月。正見上朝人。老桂欹藏樹。纖鈎側抱輪。氣清仍泛露。光淡卽迎晨。尙作裴回意。西樓對結鄰。
落月

已照金樞穴。初乘玉女扉。望花愁桂老。數葉畏萸稀。漢蚌兼珠隱。邊兵背塞歸。持將離妾恨。一問上天飛。
答勸農李淵宗嘉州江行

嘉月嘉州路。柯峩按部船。山圍杜宇國。江入夜郎天。嘉州古夜郎國霽引溪樓望。涼供水館眠。愧君舟楫意。遂欲
濟長川。來時有寧舍濟川航之句

景文集卷十一

五言律詩

早發大堰

曉戍隴隴白。春流納納深。生煙纔著樹。罷月稍依林。野路趨斜岸。漁舸泊暗潭。尙緣歸國意。差足慰離襟。

新竹

最愛中唐竹。春來百箇鮮。笋殘霞落泊。梢散粉嬋娟。早葉危銜露。昏枝巧住煙。寧孤一日賞。況在此君前。

永興鄭資政鞏縣路逢雪見寄

大旆關河遠。同雲天地浮。凌晨逢朔雪。此路向西州。寒襲生犀健。光催暢轂流。餘情念東郭。穿履趁英游。

峽中逢雪

峽內逢霏霰。凌晨望已迷。寒花纔集棧。斜片旋沈溪。戶入垂繒壤。田成種玉畦。速乾殊未惜。山道潤無泥。

冒雪馬上作

大雪浹天畿。晨瞻望禁扉。二儀連皓氣。萬物共清輝。樓迴標銀闕。臺寒壓粉圍。瑞花真有意。偏著入朝衣。

四望亭

秋城聊一眺。物色已蒼茫。爽籟風驅遠。寒烟晚曳長。祠成樽作社。戍罷女留牆。要是凋年感。能回倦客腸。

秋日書懷

秋旻蕩喧濁。茂宰屬高情。水遶溪初浪。林乾籟自聲。醉茵留剩暖。歡瑟泛餘清。尙念江湖守。其如華髮生。

送潘祕校赴潁上簿

捧檄去三銓。招招客叩船。倦游驚密雪。離思道么絃。淮月開帆暝。京塵減綬鮮。枳鸞非久息。刷羽竚來旋。

送南頓胡薄

密雪妍辭盛。垂牕怒翼開。聊從百里佐。初露七年材。集隼趨侯府。歌驪酌客罍。時年無道弗。庇邑邇天臺。

舟中三首

舟行不礙動。縱目望聯隄。稍覺前川近。徐驚後樹低。魚游隨聚沫。禽度帶殘啼。自趣家田路。春清況日暸。漠漠朝煙上。霏霏野氣和。驚鴻自去渚。戲鷺不沈波。田峻耕扶耒。溪童食啄蠡。維舟時一眺。舛踐損春沙。霧迴緇林趾。波生齧岸沙。漫紅披杏帶。短碧上蒲芽。鮭菜隨宜有。漿醪不用賒。行行樂蕭散。未覺遠京華。

物外亭

飛宇冠蒼岑。盤盤上百尋。風含太虛爽。雲作下方陰。塢桂寒仍燠。岩猿暝始吟。知君有高興。天壤共登臨。

秋日詠庭樹

庭樹報秋歸。蕭然芳意衰。露危陰處葉。風勁暝前枝。嘒嘒蟬嘶早。梢梢鵲定遲。江潭正搖落。司馬不無悲。
枯樹賦引桓司馬事云。今日搖落悽愴江潭。

司徒侍中宣獻公挽詞二首

斯文推舊德。憂國變華顛。夙夜勞三事。東西止百年。溫辭聯冊祕。中宮冊文。公實爲之時。稱名筆。良史大都傳。三朝史皆公參撰。

他日賢臣壘。心知望圃田。

美疾交明晦。浮齡詎控搏。宗盟一箇弱。今與伯氏同參宰政。一時頓稱兩宋。人贖百身難。賜歛榮絺袞。臨哀駐玉鑾。欲知桃

李愛朝絨共汎瀾。

送蒙城簿謝煜先輩〔案〕謝妻即祁女弟。

曾第飄飄賦。仍勞冉冉趨。嘆時三嗅雉。倦別一飛鳧。句簿虛公几。迎漿溢里壺。異時齋閣闕。明陟在丹塗。

送江陰簿江楚材先輩

覺舍久過從。清言服阿戎。半綸人結綬。一箭水分風。行稻鮮原綠。攀花雜樹紅。羨君談有助。新論得王充。

送炳宗巢簿

世德封胡後。英游終賈年。塵淄去郡客。木落渡淮天。揖吏貪持簿。勞歌勸倚弦。無憂親釜薄。新復古圭田。

觀相國長城公畱題藥師院壁

擁節趨瑤縣。回輿禮梵仙。望雲催覲日。零雨記歸年。蕙露霏毫潤。尼珠入局圓。斯人具瞻地。二絕資金田。
題玉溪符上人清風閣

齊療翠霏間。人高境自禪。閒心溪上月。佛髻檻前山。畫漏依蓮改。晴雲識棟還。誰持快哉意。來此共躋攀。
李中令挽詞二首

家賜齊侯履。人推郤縠文。結婚榮外館。謀帥得中軍。盛集追園蓋。逾章託隴雲。不圖新渚畔。更作死生分。
贈遼充幽隱。鳴簫異素輪。山丘華屋遠。桃李故蹊春。使幕被愁霧。談犀委暗塵。須知悟生滅。終得法爲身。
龍巖寺

磴齒緣蒼蠟。簷牙冒紫氛。樓鳴穿峽瀨。堂宿抱峯雲。鳥散生臺晏。僧歸浴樹曛。居然化城地。長與客塵分。
農閣

茵開俯江干。西南蜀塞寬。看雲記巫峽。望日省長安。鈿峯峯頭碧。霞皴荔子丹。比來秋物好。誰伴數憑欄。
聞杜宇

傳聞望帝冤。底處最堪憐。蜀月將殘夜。巴山欲曉天。周軍嘗化鶴。齊后亦爲蟬。物變皆如此。非君是偶然。
春野觀農事

茂氣回鮮野。寒姿換故林。敗防溪響急。新耒痕深。乳雉嬉原隩。歌牛下浦陰。吾廬堪學稼。將老有初心。

唐詔監籓池陽市征

五鼓歇津亭。風帆去斗城。美材王國秀。獨木縣官征。萍蜜浮罍劑。蓴絲雜釜羹。袁郎秋詠去。江月對盈盈。

早秋夜坐

宵旰炎堦歇。顯氣襲中閨。倦鵲兼河轉。初蟾共月西。客愁無處所。世慮足端倪。清客纔成茲。臯禽且穩棲。

秋日書懷

風頭日蕭索。爽氣自西岑。暝戍有傳鼓。寒城無罷砧。未論鄉思苦。且念歲華侵。目羨高高鴈。先時到上林。

得伯逢書

書來何所道。報我二毛生。種種因年化。星星著領明。別離纔幾日。感慨若爲情。且莫悲遲暮。須容四海兄。

予于伯逢不
啻十年之長。

伯逢欲予買一田墅因成自訟

予從大夫後。祿乃二千餘。簪筆論何事。藏山著底書。病教年事早。拙使宦情疎。合治菟裘未。蝸牛尙有廬。

西園晚眺

弱柳蒙蒙密。新花袞袞繁。貪尋芳舊遠。遂到落霞昏。亭榭銜山鷺。池波撼月痕。惜春還語客。慎勿訴餘樽。

李先輩昆仲見過

有客過窮巷。門羅日晏開。南州一榻下。平輦二龍來。霏雪欣談麈。炊菰乏案杯。自慚隣壁焰。時照不燃灰。

公園

幽興足端倪。危橋便見溪。浪輕魚喜擲。山近鳥工啼。弱葦披風激。涼蔬甲雨畦。使君來已屢。林下自成蹊。

八月十四日夜東軒餞趙同州志元吳陝州冲卿徐潤州君章

明月不常值。中秋能整新。誰言一堂上。相與異州人。適意苦難得。舉杯寧厭頻。清光定千里。他日遠相親。

訪隱者因題壁

巖徑躡雲屨。藤蘿矢晦明。青谿一道士。籃輦兩門生。山溜足奔轡。松風無罷聲。願同沮桀侶。林下耦寒耕。

哭郭仲微三首

倉卒聞嬰疾。何辜遂沒身。哭筵同產子。仲微無兒。惟兩猶子。義當主祀。霜寢未亡人。家有邢山舊。仲微先塋在新鄉。天爲京兆隣。

想君齋志恨。不使白楊春。

我作魚符守。君司鳳詔文。予出壽陽時。仲微新掌誥。他時談笑罷。今日死生分。怨涕翻滌浪。悲魂引鄭雲。山陽懷舊笛。

腸斷不堪聞。

謝氏雖多女。仲微有三女。中郎竟乏兒。人生忽至此。天道果無知。一代英才往。千篇故稿遺。生平同翰墨。不及

鏤豐碑。子解郡時。仲微已葬。內相吳春卿作銘誌。

夕坐

岸幘坐前楹。天圍極望青。日華開嶺霧。風影碎池星。重露驚棲鶴。幽叢帶暗螢。塵機心久息。寧待據梧瞑。

〔案〕莊子冥讀作眠。但古無眠字。此仍作本字讀。

西樓夕望

炎氛隨日入。岑寂坐遙帷。倦鶯昏投浦。驚蟬夜去枝。桂華兼月破。槎影帶星移。珍重牕風好。羲人卽此時。

偶書

悲秋葆髮生。倦客厭離身。九奏莊禽眩。千鈞楚俗輕。媒勞傷假塞。歲晏恨崢嶸。誰訝游都久。方歸谷口耕。

答書

樂樂餘病骨。踽踽本孤臣。夷餓懷食粟。軻居憶徙鄰。予方嬰內艱之痛。舊園寬脅帶。錢刻暗書筠。親見揚雄者。容儀不動人。

答書牛馬走。卜疏草茅人。久謝輪囷器。羞言阿堵神。觸籠摧勁翮。照沫曝窮鱗。尙欲求糟粕。心知老斲輪。

和朱少府苦雨

滯淪連春晦。層陰接夜分。驪壺惟發電。愁棟但生雲。里突居無爨。官蛙坐厭聞。遙知霖唱罷。客思轉相紛。

歲除

彫節真如借良宵此向闌家儲宿歲酒鄉送大難寒舊卉回新物來情續往歡匆匆餘幾刻催具五辛盤
詠酒壺

刻像小踰躑無情是所憐客歡迎指顧觴冷寄回旋屢轉疑投節將休似取妍勞君戢深意醒者勿須傳
答書

經櫓摧無幾書刀削未休胡能反招隱更欲傍牢愁漸硯寒餘滴牕燈明映籜子威銷骨盡何相得封侯
韞子威傳小史有封侯骨

望仙亭晚眺

日晏來憑檻要知刀筆休晚雲山曲拂麤飯客稽留未覺清言減猶堪大白浮狂歌誰擊節只是自搖頭
明月湖

湖色淡無際月華相與閒臨波雙壁映照浦一珠還宿火汀洲外橫烟桑柘間不妨清思劇舉國盡溪山
晚眺

危欄真可倚極目盡高原雙堠驛邊道孤烟山下村高風生樹響寒水落溪痕坐見斜陽盡歸鴉滿翅昏
胡同年恢信州弋陽簿

籠櫻沈釀宴津鼓愴離羣道出東南水心留西北雲秫田供醞劑練幅換書裙燦闕方呼俊歸來佇獻文

黃垺勾建昌簿

露風徹宴卮。十幅曙帆飛。路入江山國。人兼綵繡衣。草堂空岫幌。偃室聽琴徽。誰識無雙譽。新從口下歸。元處宗安化簿

軍府沈千奏。邊城佐一同。鄉書黃耳遠。客爨屢屢空。怨曙羌笳月。嘶寒代馬風。未應期會急。平日廢談叢。同年毛洵勾簿新建

霜寓

年衰冬集罷。鷁首曉帆催。枳棘非鸞處。膏腴得父才。澄江限天闊。孤鶩透霞來。此地留清賞。誰同耻宴臺。霜寓澹秋光。崢嶸歇歲芳。地形侵楚庫。渠尾入淮長。惠民渠首嵩洛尾入淮。廬集牛初下。羅稀鳥恣翔。病悰多感極。身託茂陵傍。

季秋十九日追還學士院回舟入都作二首

上恩留不遣。仍棹越船回。人忝玉堂署。魚還符節臺。危心摧櫓罷。病眼刮雲開。讀徧淮南詔。慚非視草才。得麾初出守。趨召遽言旋。露藿元傾口。秋槎卻上天。丹塗容蹇步。星弁許華顛。再奏皆聞罷。慚妨此路賢。

古邑二首

古邑逢池上。私居市道鄰。初拋三釜粟。來作一廛民。乞火黔薪突。繙經振隙塵。何從復何去。更欲問圓神。

陰雨離邦遠。編蓬儻廡卑。人非一國敵。家乏萬錢貲。賁自云家賁不滿萬錢江海嗟漂蕩。乾坤惜變衰。此時看落葉。寧翅長年悲。

三封田墅

驅馬三封下。還家值日西。林間尋路隘。露裏入山迷。僮勸仍依樹。雞閒已上棲。暫來翻似客。鄰酒夜過攜。清和遷首序。岑寂此憑欄。澗雨虹前罷。林櫻鳥後殘。野姿連草向。天影入池寬。日暮嚴城阻。裴回惜據鞍。

行藥

行藥來溪上。園秋損物華。漫叢繁野菊。荒蔓繫寒瓜。野曠難藏樹。山明卽變霞。病身慵事事。樓鼓謾催衙。江夏黃孝恭。數遺新詩。因以是答。

萬里江南客。三年澤畔身。驚弦已瘡鴈。涸轍欲窮鱗。日月奔騰晚。烟花感慨春。誰能爲此曲。無乃數奇人。答轉運王工部到壽陽卻乘流東下以詩見寄。

聞到清淮上。還乘清溜回。緣持使者節。難把故人杯。曙蓋星銜柳。昏郵甫亞梅。情離并感昔。都向句中來。答景毫宣徽吳尙書見寄短偈。

玉帳論兵罷。東方靜守藩。有塵都是客。無法可容言。以上四句仰奉海鳥逢觴怯。醯雞戀甕喧。白謂因公四句惠。彌覺對酬煩。

答連生見寄兼簡同邑胡希元

京華倦遊客。顧我損文鱗。道覺窮方勝。交緣淡更親。句成池草夕。訊到隴梅春。欲答雙盤恨。清才彼有人。

答刑部王侍郎病中見寄

請告煩開許。循衰分退藏。病淹三折臂。愁熱九迴腸。凍酌思同酌。仙丸得徧嘗。深慚白雲老。相憶未相忘。

偈答王侍郎

遮莫傳衣去。饒他舍棧回。雪雖爐上見。珠自髻中來。刼刼無真諦。人人止妄猜。公知兜率否。舉足便塵埃。

觀燒

白草開平野。炎暉照暮雲。商原寧易嚮。崑玉怯同焚。田燭宵俱遠。邊烽曉不分。方陽休自任。阮瑀久從軍。

西齋秋晚

霜華零暮節。日氣淡長穹。池減無留潦。林寒少罷風。蟲鳴星杼促。蟬起露綏空。隱几無紛慮。窺園嗜晚松。

西園晚秋見寄

中園秋物曉。清玩日無窮。暝篠深留翠。寒花淺作紅。鶴鳴殘滴露。蜩咽已涼風。誰伴調絲管。心知憶戴崇。

和伯氏小疾原韻

握臂苦悁悁。蒼華倦晝簪。悟非遽瑗早。達想淨名深。齊鹿閑三槩。仙岡戲一禽。獨應吳客問。眉宇識侵淫。

悼祚禪師二首

兩股飛神錫。千金供住園。吹毛曾有問。得髓更無言。蘭紫恩袍異。今宣帥副馬李公素所推重表賜紫衣。蓮香社侶繁。雙林

今奄忽。淚目送風幡。

擊電傳心要。浮漚厭世喧。一牀空病室。五葉識諸孫。風慘萎花墜。塵流舊鑑昏。導師寧怛化。緇侶自銷魂。

景文集卷十二

五言律詩

陪謝紫微晚

積雨漲秋濠。輕舟共此邀。菰蒲斂鉞鏑。蓮芡熟囊韜。岸靜魚跳月。林喧鳥避蒿。歸時興不淺。風物正蕭騷。

答朱公綽牡丹

珍卉分清賞。飛郵附翠籠。歸金點鬢密。璋玉鏤跗紅。香惜持來遠。春應摘後空。玩時仍把酒。恨不與君同。

渡湘江

春過湘江渡。眞觀八景圖。雲藏嶽麓寺。江入洞庭湖。晴日花爭發。豐年酒易沽。長沙十萬戶。遊女似京都。

臘後晚望

寒日緊難定。鳴笳弄已休。凍崖初辨馬。昏谷自量牛。漢樹臨關密。荒泉入塞流。登高能賦未。風物古堯州。

中秋新霽壕水初滿自城東隅泛舟回謝公命賦

齋舫談經後。官池載酒行。斜陽鳥外落。新月樹端生。清漾思江浦。夷猶遶郡城。東轅有遺恨。日日物華清。

讀絕交論

嫌忌蕭朱未盈虛田寶問言雖甘若醴心定險于山覆轍何能救頽波遂不還居然孝標論抵几若爲刪
和夏推官奉太夫人就養仲氏次韻

盛府從軍日大家隨子初伯兮均潔膳仲也慶將與霧含嵩塵薄霜程鞏樹疎循陔傳詠切匪夕佇歸歟
寄涇北都運待制施正臣

我作東南守君爲河朔行旌旂向江步笳鼓入邊聲共結光華遇僕與正臣相繼拜恩難禁離索情惟應指羊酪未肯下葍羹

探題得小橋

尋幽路窮處畧約跨回溪一水虹相映雙華鶴自棲淺痕過釣艇斜勢截橫隄引節誰憑望秋光徧水西
蓬池二首

大道來中縣餘糧徧近原狙林朝芋隕斷屋晝茅喧短日方催暮低雲屢向繁我憂寧易寫匪有悄無言
天形垂沆漭原勢帶紆餘社久熏無鼠淵澄察見魚駟駟開牧房塞塞度柴車卻望斜陽市行人掉臂初
雨夜

滯雨兼蘭夕遙帷更燭房疾雷方破柱驚電或生牆易斷幽衾夢頻迴逐客腸新歡誰復得最是楚高唐
送睦州柳從事

唱第千人俊。從軍十部賢。雞翹迂賜綬。鶴首赴歸船。別思瑤華岸。懷鄉玉膽天。不妨賓弁側。新曲徧鷗絃。
城隅晚意

寥寥天意晚。稍覺井閭閒。水落呈全嶼。雲生失半山。牛羊樵路暗。燈火客舟還。曠思輸鳧鶴。歸飛沆瀣間。
卽事

中伏纔無暑。斜陽未卽曛。暫光風處葉。餘墨雨殘雲。圃埽繁蔬甲。堂坳疊蘚文。巾幘殊上喜。文酒半離羣。
水亭

地清蟻衣接。天澄穀霧開。微風發琴籟。殘月減珠胎。鳥散纖條動。魚遊細浪來。坐堂兼伏檻。恨乏楚人才。
送戚祕丞典上饒錢監

左典吳山冶。行行榜客舟。終無善宦巧。肯爲著書愁。別思都成惡。芳辰信易遒。江南饒杜若。何興奈高秋。
贈清逸魏閒處士（案）閒卽處士野之子

奕世依晶石。褒恩下帝庭。姓名高士傳。父子少微星。池溜遙通澗。家林近帶坰。分明詔書意。天極賜鴻冥。
七月二十七日

客鴈歸何處。寒蜚鳴不休。兼之清夜永。副以長年愁。家令有移帶。中郎餘白頭。此懷誠自感。何賴怨高秋。
七月二十八日

秋物向搖落。客心真悄然。高風已涼夜。澹月始晴天。拂幌單練怯。凝塵故扇捐。露華休早滴。羈鵲不曾眠。

寒夜始長

四海秋風晚。千門夜刻長。梧桐老空井。蟋蟀近人牀。暗燭勤垂燼。離鴻短趁行。生平江海志。耿耿未渠央。

將歸二首

遠假西南守。三逢梅柳新。衰令宦情薄。老惜歲華頻。鄆釀供銷日。巴禽巧喚春。離家何所恨。鴈後作歸人。

雲棧短長亭。今茲重作經。邛峽叱殘馭。蜀分使回星。旅餐雙垂雪。羈懷一泛萍。驪駒在門久。此曲若爲聽。

夏日陪提刑彭學士登周襄王故城

聊隨漢使者。一上周王城。片雨北郊晦。殘陽西嶺明。野禽呼自別。香草問無名。誰復歌離黍。惟興箕穎情。

寄大固山嘉祐院長吉上人

〔案〕上人曾遊京師。得宋祁以下一百四十五人所書般若經。建臺以貯之。

名高身愈隱。孤錫倚巖扃。園布黃金地。臺藏白馬經。菴雲吞暝燭。澗月瀉虛瓶。坐想谿橋路。莓苔又幾青。

寄淨名菴僧長吉

故人詩未報。恨恨復經年。夢去長江路。心知寶所天。孤情巖桂老。逸思暮雲傳。無奈纓綬累。猶乖方外緣。

東晉

倉卒浮江日。聲名建號初。羣臣讓禁樹。上宰製單練。氣銳開桁戰。心歡折屐書。織兒競撞壤。不念好家居。

聞歸鴈

故歲東南客。新來西北飛。聲迷江月老。陣入塞雲稀。遠恨拋書素。餘音付玉徽。行人落君後。搔首未成歸。

薛道衡有人歸落鴈後之句

春夕聞鴈

聲繁知併舉。陣急想斜分。臆飽江南稻。身隨代北雲。足書煩遠寄。箭道怯虛聞。口噤悲黃鵠。相望不及羣。

送黃寺丞謫濠梁

問關羈籍遠。跌宕壯心違。倦逐淮禽去。欣同塞馬歸。時來富且貴。事往是耶非。姑共春清酌。徐徐遣世機。

詠菊

壽客若爲情。風流友麴生。殿秋安晚節。爲隱被香名。曼衍南陽種。淒涼楚澤英。見山應自語。今古幾淵明。

黃花道

驛道雲山裏。悠悠千騎行。猿禽互啼嘯。崖嶺各陰晴。樹合天疑窄。川回地忽平。錦官何日到。菖葉已催耕。

中秋對月

圓期歷秋半。飛影破雲端。明極翻無夜。清餘遂作寒。桂繁團露濕。輪駛渡河乾。且置窮邊思。何殊故國看。

孫抗寺丞宰晉陵

舊筆刑丹燥。新辭苑雪妍。一名遲上月。再擊始垂天。鷁首凌波穩。鳥翁賜綬鮮。邑歌豐暇日。擿句暮爭傳。
有懷舊隱

官事未易了。田家胡不歸。煙原射雉樂。春慘養魚肥。菜密成巖幄。蘿長代石衣。無爲落吾事。坐老故山薇。

屬疾五首

腐肉填鷗素。華軒載鶴身。閉關吾有謂。當路彼何人。帶眼移仍數。顛毛變愈新。惟無公幹譽。他味似漳濱。
淹臥日無聊。年侵葆鬢凋。久衰翻似鳳。危息乍成鵲。筆倦長棲格。琴慵不襯襦。心知煩慮苦。寧望一九銷。
自昔聞稱疾。于今是養疴。三盃留客案。五子倦朝珂。落落堪憂苦。星星奈老何。酒希非所嗜。楊宅竟誰過。
天假支離養。人懷寂寞慙。衰容行得老。苦節遂無甘。飛鳥惟宜下。疲驢詎可騁。吾生知所守。嘲客勿多談。
里旅居仍隘。臺家疾見寬。何言漢樸學。正似楚枝官。煦渚藏勞尾。投林戢倦翰。上恩何日報。卻步已蹒跚。
祇答公序相國二兄見寄二首

前時同出守。星鬢各蕭蕭。蹊李伐不食。原禽行自搖。棹前饒沸浪。蓬處但驚颿。素願山林隱。公乎不在招。
壯引朱顏往。衰招白髮生。危心幾何折。勞尾自然縈。把酒天涯恨。搔頭歲暮情。將何獻康樂。衰思頓如醒。
公近有訊。謹報。
故于亂章見意。

智成上人奉陪中山公赴淝上

宗工方出守，大士此相親。不有今平叔，難酬彼上人。昔文殊讚云：彼上人者，雖爲酬對。氈毹連榻具，笋脯對盂珍。別後臨川偶，同翻幾葉新。

江南木芙蓉，張子春云：其高如樹。中山地寒，纔數尺。花瘠，色淡。八月已開。

江南高比樹，塞北僅成叢。向晚誰爭豔，防寒淺作紅。弄條風淅淅，銜葉蝶忽忽。且作黃花伴，無令歎罽空。

通判茹太博惠家園新茗

雷鼓殷礮，山春槍苗第一。新雲供烹處，碧露餉摘時。津甌潔凝芳乳，羅織緘練麈。貺予知有爲，多渴思遲人。

秋興

天地西風徧，亭臯衰意生。寒雲終不雨，危葉自多聲。晚蟬猶嘶樹，啼鴉稍着城。默然孤客思，年序共崢嶸。遙夕何曾寐，孤懷有爲憂。謀多真逗撓，師老但誅求。朔霧摩邊壘，羌風殷戰袍。吾生誠用寡，歎罷只搔頭。先日二毛生，秋來無復驚。南風隨楚俗，北斗望都城。塢栗霜開罅，池蓮雨折莖。停罇問天意，何適付枯榮。

夜分

夜分羣動息，秋意久勞勞。林淨月華上，河明天界高。街風遙疊鼓，園露暗僵桃。萬事蹉跎外，惟應得二毛。

送駕部俞員外良孺知江州

朝弁辭清曉。齋牕汎暮秋。官華飛雉省。地劇左魚州。湓水遙浮郭。天章近占樓。知君乘月夕。不淺是風流。

賦得新秋似舊秋

新秋搖落意。只似舊秋時。流景預何事。長年真自悲。芙蓉兼露歇。楊柳帶蟬衰。歎罷蹉跎在。惟應素領知。

老去

老去慣搖落。第看芳歲陰。穗殘飢鳥集。荷破曝龜沈。遠岫多餘紫。寒溪有定潄。殘蟬何所畏。緘口抱秋林。

衰感

眩罷目還暗。花殘鬢益稀。長喙病莊舄。孤憤老韓非。坊酒叨常秩。鵬花濫賜衣。家田耕熟未。元亮欲言歸。

張轉運席上

偃藩多式宴。佳雪屢飄飄。意感年將盡。歡容酒剩行。伊公調鼎樂。羊祜裘輕。沉屬輜軒暇。須容心賞并。

答張學士西湖卽席

勝地紆佳客。高秋會賞心。返霞延落照。餘岫補疎林。捉麈談方熟。持螯酒屢斟。無煩命絲竹。擷句是清音。

迴堞

迴堞巒岈極。長天蒼莽中。遠溪寒不浪。高木暝饒風。棧層休王馬。檜纍隔苑熊。殘霞牽望眼。時到夕陽東。

穉中散畫像

顯長康畫中散爲目送飛鴻手揮五絃像世共貴之謂以風韻可想見也

彼美雲章子。脩然天外情。凝眉逐層霧。俯手散餘清。霄迴心逾遠。徹遷曲暗成。千秋想蕭散。方覺繪毫精。

泉

容與下層岑。飛流界百尋。記方誰辨玉。雜溜自成琴。細浪浮烟闊。迴波逗月深。我來聊挹注。嚼藥有初心。

芭蕉

逃臘藏深牕

剛入至冬。燭其根。藏至春。復興而殖之。

乘春發故夢。雨障單葢側。風偃半旗開。脆理繒爭裂。斜規扇欲裁。無

堅喻浮世。金粟信多才。

言志

志豈觀非聖。才猶恥壯夫。窮愁五經笥。感慨八騶呼。昔隱思投耒。今行誓裂繻。莫邪方有請。誰爲鼓洪爐。

寄題元華書齋

比日投簪隱。孟逢列舍椽。值巖因鑿牖。仍礪卽疏泉。斧爛仙基路。花飛佛雨天。諫帷他夜夢。猶在翠微顛。

小酌感春邀坐客並賦

林下復池邊。其如春暮天。花仍無數落。柳亦第三眠。強飲非能劇。狂歌不取妍。流芳何預事。只是自怡然。

喜藥山賢師見過

風林曾語別。王舍此相逢。淨月常涵水。孤雲易去峯。供緣賓閣飲。師與清源參預。領忘言之契。耳界帝城鐘。卻舉當年話。無言促塵松。

寄題藥山牛欄庵壁

昔人牛口下。胥宇化南州。祖地千燈續。荒垣八字留。漏長蓮葉晦。園勝柰陰稠。後嗣推崇意。同風古佛流。

送天雄監兵李中吉

督府監軍重。清時握節榮。長雲抱漢壘。殘月偃邊兵。戍霧漁鵠壘。衢風鶴蓋平。不應煩暑路。河朔趁飛觥。

萬秀才園齋

仁里樂丘園。茨茅構迴軒。檻風叢篠密。畦雨晚菰繁。列岫非他境。蔬流卽故源。彥倫回駕日。于此愧驚猿。

水聲

淙波聲可愛。最與靜相宜。激射不平處。潺湲無罷時。擁花含驟咽。礙石濺空危。便作山林趣。寧妨吏隱師。

長安道中悵然作三首

三輔古風烟。征驂悵未前。山園蓬顆外。賈山譏始皇侈葬。言後世不得蓬顆庇冢。宮室黍離邊。樹老經唐日。碑殘刻漢年。便須

眞隕涕。不待雍門絃。

興亡作今古。事往始堪悲。宮破黃山在。城空北斗移。走岡寒兔急。啼戍暮鷗飢。灞岸重回首。惟餘王粲詩。

城闕今安在。關河昔所憑。種祠秦故峙。抔土漢諸陵。花樹圓排薺。樓雲淡引縈。南山不改色。千古恨相仍。

晚晴

積晦澄天寓。浮涼湛物華。遠雷猶送電。殘照卽成霞。賀燕飜空迥。傾梧疊影斜。披襟無內熱。寧憶鄭生瓜。

景文集卷十三

七言律詩

開園丘禮成肆告

齋幄連蜺駐玉虬。萬靈遙護翠雲裘。寶籙竝確迎神曲。卓馬爭趨助祭侯。封屋都人差賜帛。賤星牢口闕無囚。露蕭雷解疏恩美。萬和歡聲速置郵。

癸酉六月奉詔修耜田記十一月詔罷賦詩

三時受詔擁緹油。曲筆無功苦思抽。不得成書同太史。須知非我異春秋。空言自合因人廢。殘藁猶應蓋甌。留記草纖悉印送史院歸臥私庭深閣筆。飽嘗雞膳太悠悠。

和晏公園丘詩

仗外鮮雲斂夕容。蹕聲遙下紫營東。迎神祕座擁金密。暇食清壇烈火紅。七萃禁戈攢月冷。萬侯朝璧照霜空。天心帝意通歡豫。併在柴薰縹緲中。

元夜觀正陽錫宴

雲端崑闕下呼鞭。綵樹遙分坐狄前。山戲百層平樂地。佛輪千影瑞甌天。祥風入助銀花麗。寶月來供雉

扇圓獻歲承平多樂事。繫靴誰美唱唐年。

初侍講筵有感上呈經筵諸公

邇英何幸奉經筵。俗狀婆娑艾服年。蘭葉初窺岡上字。奎鉤乍識禁中天。坐憑重席慙清問。能讀三墳賴衆賢。猶藉向來稽古力。不然須合早歸田。

再侍經筵有感

露門重幄紫雲開。何意孤臣得重陪。攀樹已驚劉放老。受釐猶及賈生來。華綈藉暖瞻宸几。甘露浮香入賜杯。稽古雖勤成底力。心知不及漢儒才。

奉和晏相公攝事園丘中書致齋

相閣齋居政事西。茲辰正值朔雲低。雪園鷗冷應先舞。雀樹鷄閒欲早栖。擱筆暫停黃紙尾。解驂猶放紫茸題。仙謠唱罷微陽動。誰見林間荔甲齊。

禮局致齋

枌榆秋報漢家壇。齋誓先朝令不刊。抱絕一身依禮署。飯蔬三日屬祠官。天池唳鶴驚宵滴。宮堞棲烏噪暮寒。倦枕不煩神櫟夢。有人無用亦常嘆。

禁門待漏

破月餘光淡禁街。駐車聊候九門開。雙蟠曉闕蒼龍動。斜倚春城北斗回。漏箭急傳催疊鼓。酒爐爭擁賣寒醅。元規塵影真堪畏。已傍游人要路來。

仲冬二日使到頒翠毛錦旋欄

翠裘朝罷轉昕霞。皇帝十月一日初御夾袍中外頒賜衣襖。頒服諸方走使車。泥和五芳中出詔。錦裁雙獸織成花。錦作花地雙獸文。官叨侍橐恩加等。待制官在京賜紫羅例及和門賜有差。詔并賜在城諸軍校。坐襲餘溫身更寵。不慙多病帶環賒。

朝陽

臚膊雞聲夜向晨。東方飛景到雲林。簾幃已是曠曠曉。庭戶全無噎噎陰。可是梧桐長得地。也應葵藿久傾心。日邊早晚來環賜。見說清光注意深。

觀上朝

鬱葱佳氣護天臺。銜尾茸題隘路槐。金箭忽鳴衡漏盡。火城爭撲相車來。黃人日映仙盤上。閭闔天隨禁鑰開。規地凝深誰得見。渚鸞雛鷺自趨陪。

再入翰林

銀臺路入複門賒。四載重來鬢愈華。況自秋毫皆帝力。何言舊物是吾家。伯氏一爲翰林予則再爲之。宮盤浩氣浮襟爽。省樹珍陰疊殿斜。書枕夢殘聞吏報。日痕還復度磚花。

聞後苑賜宴

漢家殿幄紫雲連。萬品仙葩匝賜筵。露蘂半晞仙掌外。斗杓長在帝車前。液池綵鳥棲連籞。鈎盾祥雉徧弄田。病客無階陪臺飫。除因斷夢到鈞天。

陪季秋大宴

祕殿霞曦幾刻移。天臨法座儼朝綏。魚龍霧暗充庭後。羯鼓風乾解渴時。山簪歡聲來廣座。花留和氣入繁枝。自憐侍從非方朔。不識壺醴是隱詞。

憶上苑錫宴

長懷禁籞宴嬉年。帳殿深沉望碧蓮。秦地河流疑象漢。上林宮繚欲捫天。恩盃蘭末流霞溢。蹕道梧陰綵羽鮮。紫陌暮歸人籍籍。汗帷揮雨杏粘韉。

謁四陵下宮

四陵煙栢蔽團暉。曉束朝紳拜廟闕。臺下俗無西向射。寢中人護月游衣。垂髯上漢龍難見。耘野連天鳥自飛。爵畢驅車循故道。經時回望悵依依。

直講周歲

本自悲涼葆髮多。何緣末至濫中阿。馬肝不食非論味。狗曲猶輕枉爲歌。舊學空疎緣病廢。壯情牢落伴

年過終然野鹿江魚性。長在雲林與素波。

寄南郡直講王聖源

良辰酒所獨持杯。目極南雲首重回。榮路久差冠一免。聖源嘗以公累去官經筵貪愛櫬三摧。多年道勝胸中戰。卽席人推客右才。深詔糊名求異等。佇看揮筆映天臺。

賜禁中所種稻米

中天銅雀長鳴罷。清籟滌池告稔初。刈斂方從弄田出。頒分更自導官餘。霜莖蠹秀紆宸玩。玉粒凝甘剩禁儲。慚愧有年君賜厚。等閒欹枕夢爲魚。詩人夢魚爲豐年之占

燈夕在告閒遊人甚盛

火樹繪山鳳闕前。皇都美景屬新年。烟花併作長春國。日月潛移不夜天。海邊有道上落梅飄脆管。陌頭繁杏著遊韉。須知鈞會人同樂。莫嘆秦侯抱疾眠。

休沐

出休連日似山郎。坐有蛩氈沐有湯。缸面酒華隨日轉。琴中松韻共風長。官卑寧爲今無巧。愚極曾聞古是狂。自顧支離身碌碌。樸歸囊被亦何妨。

歸沐

彌旬出沐道山頭。僦廡蕭蕭避世游。枉是胸中存壘塊。可能皮裏有陽秋。駕車款段慙鄉品。託乘鷗夷笑客愁。曲突不黔賓坐冷。時聞庭雀一啁啾。

休日

病粟支離月有儲。漢家湯沐許家居。材同曲社真無用。拙比河陽恐有餘。半夜羈魂隨鶴警。九秋嘶腹共蟬虛。誰言舐痔非長策。卻得君王五乘車。

句休

火雲疊影抱炎曦。霑沐身閒與勝宜。卷葉初開菱荷沼。輕房半紫石榴枝。茶槍早翠吟魂適。蔗境餘佳渴肺知。汗馬屬鞬非我事。到頭攘臂是支離。
門依北郭最閒坊。休令歸來白晝長。司馬苦消非我事。次公無酒是真狂。午雞初下繁陰合。夢蝶徐翻倦枕涼。自笑此生疲挾策。不知呼塞亦亡羊。
散帶家居首任蓬。閉關窮巷避雌風。官非言責如餘裕。流在儒家覺少功。慢態已成書几積。黠姿無半畫廚空。此生信有年年樂。堪置蒙莊大社中。

和樞密晏太尉元日雪

寒雲萬里送殘宵。面旋祥雲集歲朝。繁影未能藏夜燿。薄花仍欲伴春椒。光含象闕蒼龍舞。氣勒交衢卓

馬騎豐兆歡歌誰不爾。百官兼放五門朝。

學舍石榴

太學中石榴數十株。少他雜木。然其樹率多蟬蓋。

曾見芳英上舞裙。緣何此地寄輪囷。烟滋黛葉千條困。露裂星房百子勻。未羨扶南收作醖。曾經騎省賦爲珍。安仁閒居賦云。須知博望來時晚。莫促幽芳趁暮春。石榴葡萄之珍。

秋日與天章侍講王原叔會明仲正言余安道三學士集普光院

長廊盡北到禪局。宴坐林間共襯纓。秋氣只知雙鶴唳。塵喧已去一牛鳴。晨鐘暮磬無時歇。翠竹黃花相問明。妙墨仙郎題爵里。他年爲寄此中行。原叔以古篆記是集于壁。

太學建講殿割王第西偏營置

王家賜第曾開府。天子營宮此嚮儒。壞壁有經還闕里。廢臺無鹿嘆姑蘇。泉疑自湧供池溜。柱欲飛來荷棟桴。獻歲成工觀盛禮。願陪希瑟趁風雩。

落花

紫房丹萼旋辭春。素瑟悲多不忍聞。暮雨便從巫峽散。餘香猶上魏臺分。魂銷南浦波空綠。望絕長門日易曛。翠被已空桃穢遠。自今搔首更離羣。墜素翻紅各自傷。青樓烟雨忍相忘。將飛更作回風舞。已落猶成半面粧。滄海客歸珠迸淚。章臺人去骨

遺香可能無意傳雙蝶。盡委芳心與蜜房。

回郡將東還獻梁相公

留滯符魚素領垂。十年方喜覲彤闈。平臺雪罷柳陽老。宣室釐殘賈誼歸。疲馬有情依櫪嘆。倦禽知困傍林飛。相君門下餘塵在。擁篲應容一叩扉。

老還

老還東觀復懷鉛。坐對秋風鬢颯然。怨曲未平曾破瑟。故瘡雖愈尙驚弦。蕭條門巷張羅外。閱寂曹司擱筆前。借問不才爲累否。古來山水盡天年。

雪後與張轉運任通判何都官游湖上

湖天初日駐彤幃。雪霽樓臺朔氣嚴。浮隰淺花全裂縞。拂沙殘白暫成鹽。漸迎客棹容徐進。寒著賓壘喜細添。農壤徧膏民瘼息。相君餘興付厭厭。

離宛丘舟中作

子子歸檣五兩斜。浮雲盡處是京華。不隨東魯人浮海。正似新豐犬識家。笏首新荷尋珥筆。腰間故印解垂綯。多年蹇足蹢躅甚。卻畏丹泥九城賒。

將還都寄獻臣

茂陵移病在窮年。尙省長安在日邊。生意不隨枯樹盡。危心重伴死灰燃。秋風壓苑檀欒近。夕斗橫臺睥睨連。側注舊冠塵滿屋。定須彈拂故人前。

還都

一封東走罷州麾。卻趁清班上赤墀。侍史香爐留直夜。王孫春草見歸時。虛名所賴天藏拙。晚歲無如病與衰。要在屬車何所用。只堪盛酒比鷗夷。

丞相龐公歸政就第數有新詩傳播都下偶成拙句上紀盛德二首

方道逍遙一品身。盡收和氣付凝神。小車殿裏拋丞相。南極星邊伴老人。雙鶴對眠雲帳月。五芝催耨雨巖春。支離舊客公知否。私計東山作近隣。第門行馬護清埃。拂席時時宴具開。安石風流今日是。平津賓客幾人來。幄中謀熟君籌在。川上身閒汝櫂回。絕俗新章滿都紙。尙時疏傳定無才。

寄獻南京致政杜相公

調元罷後久忘機。三見東山拜詔時。公引年後凡三進秩言在典謨經舜問。規留廊廟許曹隨。人間歲月尊黃髮。方外謳謠續紫芝。舉酒祝公千萬壽。逍遙長與赤松期。

答安陸王工部早春郡園見寄次韻

五馬新回金絡頭。方春稀訟釋南囚。荆岑漢許聯形勝。渚月臺風遞宴游。自許良辰偏有感。不知清唱遂無儔。比來酒所聞相憶。對倚層城近此樓。

送劉學士守衡陽兼還故里

名帖唐家十二時。囊封自乞阮咸麾。三行牛酒過鄉墅。九向雲山駐使旗。蘭露夕薰歡潔膳。桂風秋遣怨叢枝。不應晚計還臺約。紫掖深沈佇演辭。

晚秋北園二首

寂寥臺榭使君家。日涉中園到日斜。林下歸心紛似葉。菊前衰鬢晚于花。支離粟飽寧無愧。漫漶書成未足誇。猶有一杯相伴在。判從鵲鳩耗年華。午陰初轉歇餘喧。暫到高齋一凭軒。蒲艾因依殘漲沼。棗梨狼藉晚秋園。輕涼著衽如堪掇。靜境畱人自不煩。須信吏中逢隱趣。隨宜鮭菜伴芳樽。

過洛陽有作

鬱葱喜氣抱天迴。飛柱門深拂曉開。樹綠遠隨馳道出。塵清曾傍屬車來。霧中溫洛浮仙驥。雲表神松薦壽杯。何日東都參第賦。班生猶是令蘭臺。

聞中山公淝上家園新成祕奉閣輒抒拙詩寄獻

爲樂東平得再麾。

公兩鎮
滌上

別營層閣駐經幃。溢囊祕簡青皆汗。署榜宸毫白正飛。

公常削奏于上求飛
白題榜俄蒙允賜

喜客來銜酒數。畫疑仙去啟廚稀。門前卽枕春溪路。幾曲歌成使舫歸。

移病還臺凡閱半歲乃愈始到家園視園夫治畦植花因成自嘆二首

十年獨漉走天涯。耗盡流光得鬢華。猶喜此身隨社燕。擬將何面對林花。牢槽續罷文誰讀。塊壘澆平酒

自賒。舊隱不須相掉罄。

齊人謂相
計爲掉罄

要須歸種邵平瓜。

臥治無功賜告回。驟叨鳴履上中臺。

病中改
八座

壺公天壤非真死。

衛士李士寧來謁予病曰公殆矣

不可過春分予謂人生危阨不可常故

作終制以訓兒息明
年至期不死而愈

蒙叟軒裳是儻來。經灌早蔬扶隴出。失刊園藥犯簷開。此身疎拙眞丘壑。不是當年

王佐才。

送長兄遊隨陽

漢東煙樹露蟬嘶。迴首周南涕易危。梁苑謾傳居右賦。扶風誰識最良眉。仙巾雨熱愁懷路。素壁塵凝憶

問詩。他夜夢魂知不遠。蘧蘧長繞越禽枝。

假節

誤持軍印攝中牙。朔雪添成兩鬢華。大抵不侯寧戰罪。由來寡要是儒家。山南近暖先迎日。樹北緣寒晚
作花。歲晏知非宦情薄。潁田歸興滿蒼霞。

覽從兄咸劍池編〔案〕咸字貫之，建安人，其著述有劍池編，詳見李觀集。

競爽吾宗屬俊翹，凌雲辭氣剩飄飄。十年締思輕僉賦，一骨評風壓楚謠。縱玩書牕迷野馬，長吟秋社續寒蜩。夫君自有何郎恨，枉使東陽臂肉銷。

少年

關外車徒籍籍歸，章街柳色綠如絲。薰衣別館香三日，卜夜重樓燭九枝。雪市雲迴翻祕曲，衛臯波暖寄微辭。十年酒美俄星弁，肯信尙書對有期。

自詠

四十爲郎信倦游，虛名韞鎖太悠悠。危心正似葵傾日，衰質先于柳望秋。要路風塵疲驥足，故潭煙雨廢槎頭。穎灘漸報耕疇熟，終乞閒身守一丘。

上都頻見歲華陰，偃息由來木茂林。醉若有鄉須裂地，吏如逢隱卽投簪。予聞南方山水殊勝，常有遊宦之願，以歲限未滿，不收陳請。

伯氏尤樂靜退，嘗有詩戒予云：「擲甌故溪潭。」

誤懷手版應弓招，汨汨塵容葆鬢凋。潘拙本無鄉曲譽，嵇鶩偏恃母兄驕。雨畦菰葉晨羞薄，風竈茶煙午睡銷。縱到北山堪自笑，春蘿秋桂久寥寥。

聞王侍郎請老

未老辭榮上所褒。官閒猶寄白雲曹。海邊人樂驅先下。隴外天多鶴始高。此路逍遙真有趣。他年侍從信爲勞。清商弟子歌聲妙。誰拌揮金引凍醪。凍醪即詩所謂春酒介眉壽者。

步樂北園

倦持麈尾著綸巾。清眺城隅夏物新。幽鷺儀容高似客。晚鶯言語巧于人。雨邊斜照猶銜嶺。風後餘涼自舞蘋。天借使君仁智地。此來山水更相親。

將解職抒懷上郡守

空函檄草聚浮埃。日愧西園綴上才。著帽每容司馬進。脫巾多伴使君來。孤根易變江南橘。歸夢先隨隴首梅。惟有酬恩無限淚。異時應灑別離杯。

抒懷上南京常山公

緇帷悵別倏經年。榮路心危重惘然。寧死道邊終自真。狂歌河上欲誰憐。魂隨夜蝶星垂地。信斷秋鱗水接天。早晚承明慶三入。願持雲漢續遺篇。

段釋之客都下作詩道其懷

密雪天街客屐穿。更將羈思敵彫年。無人載酒誰同樂。有物燒愁使許燃。臚臚文章千牘上。蕭條光景二毛邊。我能知子今何賴。無用長于馬腹鞭。

獻外臺王侍御

濫陪坐諾已三年。始望霜威紂弩前。
舊業久辭南郡帳。深恩獨戴故人天。
頭歆解散慙星弁。南史王儉
名解散。腹飽侏儒費月錢。
欲託牙琴懇真賞。流塵無奈晦么絃。

送蔣御史漕江南

柱後峩冠久未還。江南行府使旗鮮。
陳陳洪庾催輸粟。往往吳山卽鑄錢。
暝月早霞千里國。廢樓殘社六朝天。
時清憲筆無彈劾。供助騷人藻思妍。

荷花

晚雨跳珠萬葢勻。紅房高下照池新。
採時雙艇須加槳。行罷微波不見塵。
解把清香貽密坐。忍將芳意付蕭晨。
如何老帥殘風味。三占秋英作主人。

翰長再有北門之拜

病禡荷囊避禁闈。彌年專氣養瓊枝。
仙都去後桃尋熟。溫室重來樹更滋。
宮月舊蟾涵靜滴。武泥前剗燥殘芝。
寶釘賜帶輝腰組。尙苦春來幾眼移。

